


弘簡錄


二百四之七



漢書門類			
五	一	〇	六
九	三	四	八
冊	架	函	號

內閣文庫			
六	一	〇	六
九	三	四	八
冊	架	函	號

內閣文庫			
番號	漢	5106	
冊數	93	(56)	
函號	286	83	



弘簡錄卷二百四

明刑部員外郎仁和弘齋邵經邦學

皇清翰林院侍講學士四世孫遠平校閱

載記遼主之六

淺草文庫

聖宗皇帝諱隆緒小字文殊奴景宗長子幼喜書翰十歲能詩
既長精射法曉音律好繪畫初封梁王帝崩次日癸丑奉遺詔
卽位柩前時年十二母睿智皇后攝政軍國大事聽命母后十
月己未朔始臨朝詔諭諸道辛酉羣臣上尊號曰昭聖皇帝尊
皇后爲皇太后大赦以平章事蕭道寧領本部軍駐南京乙丑
如顯州十一月甲午置乾州十二月甲子撻刺干乃萬十醉言
宮掖事法當死杖而釋之癸酉奉大行皇帝梓宮于敢塗殿
統和元年正月戊午朔不受朝乙丑奉遺詔封庶兄質睦寧王

加宰相室昉宣徽使普領等恩戊辰以烏隈烏骨里部節度使
耶律章瓦同政事門下平章事壬午趙妃及公主宰相大王楊
隱國舅契丹漢宮等並進助山陵費癸未齊國公主率內外命
婦進物亦如之二月戊子朔禁所在官吏軍民無故不得聚眾
私語及冒禁夜行違者坐之甲午葬乾陵以近幸郎掌飲
伶人撻魯爲殉庚子
賜皇族及近臣遺留物戊申以解領爲南府宰相辛亥幸聖山
遂謁三陵三月戊午天德軍節度使顏刺父子戰歿其弟涅離
襲爵許之己未次獨山遣使賞西南面有功將士辛酉以耶律
曷魯寧爲惕隱辛巳以國舅蕭道寧爲遼興軍節度使賜號忠
亮佐理功臣壬午祭天地四月丙戌朔幸東京庚寅謁太祖廟
丙中南幸壬寅致享于凝神殿癸卯謁乾陵乙巳遣人祭平章
耶律河陽墓庚戌從樞密請詔北府司徒頗德譯南京所進律
文上如徽州以耶律慶朗爲信州節度使五月壬戌南路招討
請益兵討西突厥諸部詔北王府耶律蒲奴寧引敵畢迭烈兩
部兵赴之辛未次永州祭王子藥師奴墓丙子祭天地戊寅幸
木葉山六月丙戌還上京辛卯有事于太廟甲午幸羣臣上皇
太后尊號曰承天皇帝太后羣臣上皇帝尊號曰天輔皇帝大赦
改元覃恩中外文武官各進爵一級七月乙卯錄囚辛酉行再
生禮與諸王分册擊鞠八月戊子西巡己丑謁祖陵癸巳謁懷
陵遂幸懷州己亥獵赤山九月癸丑朔東京平州旱蝗詔振之
乙卯謁永興長寧敦睦三宮庚申謁宣簡皇后廟辛未立生日
爲千齡節以故于越屋只有傳導功命其子泮泱爲林牙丙子
如老翁川十月癸未朔司天奏老人星見丁酉將征高麗親閱
東京留守耶律抹只所總兵馬丙午命宣徽使兼侍中蒲領林

牙肯德等將兵東討賜旗鼓及銀符十一月壬子朔觀漁撻馬
濼十二月甲午東幸甲辰勅諸刑辟已結正決遣而有寃者聽
詣臺訴戊申千齡節祭日月禮畢百僚稱賀 二年正月甲子
如長濼常事後皆不書二月甲午賜將軍耶律敵不春衣東帶丙午上
與諸王大臣較射三月乙卯贈故同平章事趙延煦兼侍中四
月丁亥宣徽使耶律普寧都監蕭勤德獻征女直捷授普寧兼
政事令勤德神武衛大將軍各賜金器諸物辛卯祭風伯壬辰
以宣徽南院使劉承規為承德軍節度使崇德宮都部署保義
軍節度使張德筠為宣徽北院使五月乙卯朔木葉山九月辛
未景宗忌日詔諸道京鎮遣官行香飯僧十月丁丑朔以歸化
州刺史耶律普寧為彰德軍節度使右武衛大將軍韓侗為彰
國軍節度使兼侍衛親軍兵馬都指揮使十一月壬子以樞密

直學士鄭徽為儒州刺史十二月辛丑以大仁靖為東京中臺
省右平章事 三年正月丁巳左拾遺劉景吏部郎中牛藏用
並為政事舍人二月丙子朔改牛藏用樞密直學士四月乙亥
朔朔木葉山壬午以鳳州刺史趙匡符為保靜軍左監門衛大
將軍王庭昂為奉先軍節度使五月癸酉加蕭道寧同平章
事知瀋州軍州事六月甲戌如栢坡乙亥改歸義軍王希巖為
興國軍節度使七月甲辰朔詔諸道繕甲兵以備東征高麗甲
寅東幸丙寅駐蹕土河以暴漲命造船橋明日乘步輦出聽政
老人星見丁卯遣使闕東京諸軍兵器及東征道路拜道寧昭
德軍節度使守太子太師劉延構義成軍節度使八月癸酉朔
以高麗道路沮洳未可進征先伐女直丁丑次棗城庚辰至顯
州謁凝神殿辛巳幸乾州觀新宮癸未謁乾陵庚子謁顯陵辛

引簡錄
卷二
丑酉幸閩九月丙子行次海上庚辰重九駱駝山登高賜羣臣菊花酒丙申女直宰相朮不里來貢戊戌駐蹕東古山十一月丁丑詔以東北路兵馬監軍妻婆底里存撫邊民癸巳禁行在市易布帛不中尺度者四年二月壬寅以四番都統軍李繼忠爲檢校司徒上柱國癸卯西夏李繼遷叛宋來降授定難軍節度使銀夏綏宥等州觀察處置等使西番部帥瓦泥乞移保大軍節度使鄜坊等州觀察處置等使三月甲戌宋遣曹彬等分道來侵略岐溝涿州固安新城詔分遣使者徵諸部兵益耶律休哥以擊之乙亥以親征告陵廟山川辛巳命林牙蕭勤德守平州癸未遼軍與宋田重進戰于飛狐不利陷冀州防禦使大鵬翼康州刺史馬贊馬軍指揮使何萬通丁亥改命耶律斜軫爲山西兵馬都統賜以密旨及鈎宗印以趣征討休哥亦如

之及賜林牙謀魯姑旗鼓四劍一率禁軍之驍銳者南助休哥四月己亥朔次南京北郊庚子惕隱瑤昇招討韓德威報捷辛丑宋潘美陷雲州詔勤德還軍戊申監軍蒲鄰奏敵軍引退與奚王和叔奴北大王蒲奴隱統軍使頗德等追躡皆勝之賜詔褒美頻不部節度使和盧槻黃皮室詳穩解里等各上所獲鎧仗數又詔兩部突騎赴蔚州以助蕭闥覽橫帳郎君老君奴率諸郎君巡徼居庸之北郎君奴哥爲黃皮室都監郎君謁里爲北府都監各以兵赴蔚州以助斜軫庚戌加斜軫諸路兵馬都統闥覽副部署廸子都監以代善補韓德威宋將曹彬米信北渡拒馬河與休哥對壘南北刻營長六七里時上次涿州東五十里甲寅詔休哥等嚴備水道無使敵兵潛至涿州乙卯休哥等敗宋軍獻所獲器甲貨財賜詔褒美丙辰復涿州告天地戊

午上次沙姑河之北淀諸將各以所俘獲來上辛酉大軍次固
安壬戌圍城頗德先登破之大縱俘獲甲子賞攻城將士有差
五月庚午大敗彬信于岐溝關追至拒馬河餘衆奔高陽衝擊
溺死不可勝計癸酉班師還次新城己卯次固安南祭天地庚
辰以所俘宋人射鬼箭宋兵在山西未退詔遣詳穩排押率弘
義宮兵及南北皮室郎君拽刺四軍赴應朔二州界同禦之壬
午還次南京丙戌御元和殿大宴從軍將校封休哥斜軫和朔
奴蒲領蒲奴寧及諸有功將校爵賞有差丁亥發南京以軍前
降卒分賜扈從丁未度居庸關皇太妃諸王公主迎上嶺表設
御幄道傍置景宗御容率從臣進酒陳俘獲于前遂大宴戊午
幸涼陘以所俘分賜皇族及乳母七月辛巳以捷告天地分宋
歸命者二百四十人以賜從臣詔上京開龍寺以殺敵多令建

佛事一月僧飯萬人八月丁酉以蒲奴寧爲山後五州都管已

未詔第山西諸將校功過而賞罰之

乙室帳宰相安寧以功過相當追告身一過歸居部

節度使佛奴管五十楊隱瑤昇拽刺欽烈朔州節度使慎思應州節度使骨只雲州節度使化哥軍校李元迪蔚州節度使佛留都監崔其劉繼琛皆以開敵逃遁奪官配隸本貫領國勇軍王六管五十九月甲戌重九登高于

黑河南阜祭天賜從臣命婦菊花酒丁丑次河陽北辛巳納皇

后蕭氏丙戌次儒州己亥以乙室帳郎君吳留爲御史大夫甲

辰南征出居庸關詔以勅榜諭拒馬河南六州乙卯幸南京戊

午以南院大王留寧言復南院部民今年租賦壬戌賜京官僧

道耆老銀鼠青鼠及諸物十一月壬申古北松亭榆關征稅不

法致阻商旅遣使鞠之始許女直以兵從征癸酉御正殿大勞

將校丙子次狹底塢親閱輜重兵甲戊寅日南至率從臣祭景

宗御容辛卯次白佛塔川獲自落馴狐以祭天地詔駙馬蕭繼

遼林牙謀魯姑太魯林八等沿邊巡徼固守封疆毋漏間諜縱諸軍殘南境桑果壬辰至唐興縣時宋軍屯滹沱北邀將亂射之進焚其橋癸巳涉沙河甲午祭庶鹿神宋兵戰秦州褚特部節度使盧補古臨陣遁逃詰奪告身都監耶律琿以下各杖之仍聲其罪徧諭諸軍代以御蓋郎君化哥權節度使橫帳郎君佛留爲都監宋先鋒至望都郎君拽刺雙骨里遇之擒其士卒九人獲甲馬十一賜酒及銀器十二月壬寅營于滹沱北詔太師王六謹偵候以騎絕之母令入邢州癸卯小校曷主遇宋輜重引兵殺獲甚衆并焚其芻粟甲辰南大王與休哥合勢敗宋將劉廷讓李敬源于莫州擒賀令圖楊重進等國舅詳穩撻烈哥宮使蕭打里死之丙午詔休哥以下入內殿賜酒丁未築京觀禁軍擊楊團城守將來降上粟麥兵甲之數詔禁侵掠巳酉

營神榆村辛亥以黑白二牲祭天地癸丑拔馮母鎮大縱俘掠丙辰邢州降丁巳拔深州以不卽降誅守將以下縱兵大掠是歲李繼遷引騎欵塞願婚大國永作藩輔詔封王子帳節度使耶律襄之女汀爲義成公主嫁之賜馬三千匹寰州刺史趙彥章義順節副趙希贊彰德節度艾正觀察判官宋雄武定指揮呂行德副指揮張繼從馬軍指揮劉知進步軍指揮穆超蔚州押衙李存璋許彥欽奚軍小校隘離轄渤海小校貫海皆叛入於宋俱命籍其家屬分賜有功將校五年正月乙丑破束城縣縱兵大掠丁卯次文安遣人諭降不聽擊破之盡殺丁壯俘其老幼戊寅還南京己卯御元和殿大賚將士三月癸亥朔幸長春宮賞花釣魚徧賜近臣歡宴累日丁丑詔居部下拽刺解里偵候有功命入御蓋郎君班祇候四月丁酉率百僚上皇

太后尊號禮畢羣臣上尊號曰至德廣孝昭聖天輔皇帝戊戌
詔有司條上勲舊等第加恩六月壬辰召大臣決庶政丙申以
耶律蘇爲遙郡刺史七月戊辰涅刺部節度使撒葛里有惠政
民請留從之六年二月丙寅從征司天趙宗德齊泰王守平
邵拱闡梅言天象數有徵賜物有差三月癸未李繼遷遣使來
貢四月乙未幸南京戊戌幸宋國王休哥第六月癸亥党項太
保阿剌恍來朝貢方物乙丑論諸道兵馬備南征攻城器具乙
酉夸离董阿魯勃迭沙州節度使曹恭順還授于越七月丙戌
觀市已亥賜休哥排押諸軍戰馬因請增置涿州驛傳從之丙
辰祭天地八月癸亥遣使祭木葉山告將伐宋西北路管押詳
穩速撒哥以伐折立助里二部俘獲來獻東路林牙蕭勤德及
統軍石老擊敗女直兵獻俘濱海女直遣廝魯里來朝及修土

貢九月戊戌幸南京己亥有事于太宗廟以唐元德爲奉陵軍
節度使癸卯祭旗鼓庚戌次永州射帛書諭城中降不聽乙卯
縱兵四面攻之城破乃降因撫諭其衆勤德闡覽皆中流矢載
帝車中而歸聞宋軍退遣斜軫排押等追擊大敗之十月戊午
攻破沙堆驛己巳以黑白羊祭天地庚午分宋降軍置七指揮
號歸聖軍行軍叅謀馬得臣恐終不爲用請放之還不允十一
月甲申詔諸軍備攻具庚寅駐長城口督大軍四面進攻士潰
闞委城遁斜軫招之不降上與韓德讓邀擊殺之獲者分隸燕
軍辛卯攻闞滿城甲午拔之軍士開北門遁上使諭其將領乃
率衆降戊戌攻下祈州縱兵大掠己亥拔新樂庚子破小狼山
砦丁未宋軍千人出益津關國舅郎君桃委詳穩十哥擊走之
殺副將一人十二月大軍駐宋境賜皮室詳穩乞得禿骨里戰

馬丁巳安平侍衛馬軍司奏攻新州新樂都頭劉贊等三十人
有功乞加恩賞詔北宰相蕭繼遠等往覘之是歲始詔開貢舉
一人及第 七年正月癸未朔班師戊子宋雞壁砦守將郭榮
率衆來降詔屯南京庚寅次長城日癸卯攻易州宋遂城兵來
援遣鐵林軍擊之擒其指揮使五人甲辰大軍齊進破易州降
刺史劉輝以馬質代之趙質爲兵馬都監遷其軍民于燕京授
先登東京騎將夏貞顯之子仙壽高州刺史乙巳幸易州御五
花樓撫諭士庶丙午祭天地詔諭三京諸道分遣巫覡祭名山
大川戊申次漆水謁景宗廟己酉次岐溝射鬼箭辛亥還次南
京六軍解嚴二月壬子朔上御元和殿受百官賀乙卯幸長春
宮大饗軍士爵賞有差封韓德讓楚國王蕭寧遠同政事門下
平章事乙丑賞南征女直軍使東還丙寅禁舉人匿名飛書謗

詔朝廷丙子以女直活骨德爲本部相丁丑皇子佛寶奴生三
月壬午朔遣使祭木葉山禁芻牧傷禾稼宋進士十七人挈家
來歸命有司考其中第者補國學官餘授簿尉李繼遷遣使來
貢丁亥詔知易州趙質收戰亾士卒骸骨築京觀己丑免雲州
逋賦丙申詔開奇峯路通易州市四月丙辰謁太宗廟以御史
大夫烏骨領乙室大王丁卯吐渾還金回鶻安進吐蕃獨朶等
自宋來歸皆賜衣帶丙子以舍利軍耶律查爲常袞己卯駐蹕
儒州龍泉庚辰以遙輦副使控骨离爲舍利拽刺詳穩五月辛
巳祭風伯辛卯獵桑乾河六月庚戌朔貴太師柘母迎合搆之
七月乙酉御含涼殿視朝丙戌以中丞耶律覈麥哥權奪离畢
橫帳郎君耶律延壽爲御史大夫癸巳遣兵南征丁酉勞將士
八月庚午放進士高正等二人及第十一月甲申于闐張文寶

通內丹書 八年正月庚寅詔決滯獄三月庚辰太白熒惑翻
九十有五次乙酉城杏瑞實以宋俘辛丑置宜州四月丙午朔
嚴州刺史李壽英有惠政從民請留庚午歲旱諸部艱食命振
之五月庚寅女直宰相阿海來貢封順化王丙申詔括民田六
月丙午阿薩蘭回鶻于越達刺于各遣使來貢七月庚辰改南
京熊軍爲神軍詔東京路諸宮分提轄司置定霸保和宣化三
縣白州置洪理儀坤州置廣義遼西州置長慶乾州置安德
各一縣省遂媽松饒寧海瑞玉鐵里奉德等十州及玉山遼豐
松山弘遠懷清雲龍平澤平山等八縣以其民分隸他郡八月
乙卯祭天地九月乙亥北女直四部請內附壬辰李繼遷獻宋
俘十月丙午復告大敗宋軍十一月庚寅賑吐谷渾饑民十二
月癸卯李繼遷告下宋麟鄜等州庚戌遣使封繼遷爲夏國王

是歲進士鄭雲從等二人及第 九年正月丙子詔禁私度僧
尼乙酉室昉等進實錄賜物有差戊子遷宋來降卒五百置宣
力軍辛卯詔免三京諸道租賦仍能括田二月丙午夏國遣使
告宋捷丁未以涿州刺史耶律王六爲惕隱甲子建威寇振化
來遠三城屯戊卒振室韋烏古諸部閏月壬申遣承旨邢抱朴
三司使李嗣給事中劉京政事舍人張幹副留守吳浩分決諸
道滯獄益以員外郎庫部馬守琪倉部祁正虞部崔祐薊北縣
令崔簡甲子幸南京四月乙亥夏國王李繼遷遣杜白來謝封
冊併上宋所授勅命六月南京霖雨傷稼七月癸卯通括戶口
乙巳詔諸道舉才行察貪酷撫高年禁奢僭有歿于王事者官
其子孫已未夏國告復綏銀二州八月癸酉銅州嘉禾生東京
甘露降戊寅女直進喚鹿人壬午東京進三足鳥九月乙酉駐

蹕廟城南京城震十月丁丑定難軍節度使李繼捧來附授推
忠効順啓聖定難功臣檢校太師兼侍中封西平王十一月己
亥祭天地十二月遣招討使韓德威持詔責李繼遷潛附于宋
是歲進士石用中一人及第十年正月丁酉禁喪葬殺馬及
藏甲冑金銀器玩二月乙丑朔韓德威奏李繼遷稱故不出至
靈州俘掠以還賜詔安慰四月乙丑改臺湖爲望幸里庚寅命
羣臣較射八月癸亥觀稼仍遣使分閱十月壬申夏國王遣使
來貢十二月庚辰獵儒州東川拜天以東京留守蕭恒德等伐
高麗是歲雲朔等州饑詔免稅賦給復流民三年十一年三
月丙午出內帑錢賜南京統軍司軍高麗王治遣朴良彙奉表
請罪詔取女直鴨綠江東數百里地賜之二月癸亥霸州妖巫
王氏伏誅六月大雨七月己丑桑乾羊河溢居庸以西害稼溺

奉聖南京民廬舍放進士王熙載等二人及第十二年正月
癸丑朔溇陰鎮水漂溺三十餘村詔疏舊渠復行在五十里內
租蠲宜州賦調甲寅以同政事門下平章事耶律碩老爲惕隱
庚申郎君耶律鼻舍等謀叛伏誅壬戌以南院大王耶律景爲
上京留守封溱水郡王霸州民李在宥年百三十有三賜束帛
錦袍銀帶月給羊酒仍復其家二月甲申免南京被水戶租賦
及諸部歲輸羊并闕征三月丁巳高麗遣使請所俘人畜詔贖
還仍遣使撫諭戊午幸南京復置統軍都監己巳涿州木連理
四月壬辰以樞密直學士劉恕爲南院樞密副使五月庚辰武
定軍節度使韓德冲秩滿從其民請留六月辛巳朔詔州縣長
吏有才能無過者減一考任之癸未河汗州刺史賈俊進新曆
庚子錄囚甲辰詔代龍鳳兩軍老疾者免皮室軍老不任事者

役七月甲寅遣使視諸道禾稼戊辰觀穫庚午詔契丹人犯十
惡者依漢律八月庚辰朔詔皇太妃領西北路烏古等部兵及
永興宮分軍撫定西邊以蕭撻懶督其軍事乙酉宋遣使求和
不許戊子以國舅帳尅蕭徒骨爲夸离畢九月壬戌行拜與禮
十月乙酉獵可汗州西山乙巳詔定均稅法丁未置大理寺少
及正卿十一月戊申朔行再生禮詔諸部具所俘宋人官吏儒
生抱器能者及諸道軍勇徙者以名聞官衛德升等六人庚戌
詔郡邑貢明經茂材異等甲寅詔南京決滯獄十二月戊寅朔
詔并奚王府與理墮隗梅只三部爲一其二尅各分爲部以足
六部之數甲申賜南京統軍司貧戶耕牛戊子却高麗進妓樂
庚寅禁游食民癸巳女直告宋人浮海賂本國及兀惹叛丁未
幸南京放進士呂德懋等二人及第十三年正月甲寅置廣

靈縣丁巳增泰州遂城等縣賦庚申詔諸道勸農癸亥長寧軍
節度使蕭解里秩滿從民請留庚午如長春宮五月壬子高麗
進鷹六月丙子朔啓聖軍節度劉繼琛秩滿從民請留丁丑詔
減前歲括田租賦丙戌詔許昌平懷柔等諸縣人請業荒地七
月壬戌詔龍衛威勝軍更戍蔚朔等州八月丙子夏國遣使進
馬壬辰詔修山澤祠宇先哲廟貌以時祀之九月戊午以南京
太學生員日多特賜水磴莊一區十月乙亥置義倉十一月辛
酉遣使冊王治爲高麗國王戊辰高麗遣童子十人來學本國
語次年又遣十二月巳卯鐵驪來貢鷹馬辛巳夏國告敗宋人是年
放進士王用極等二人十四年正月丁巳蠲三京及諸州稅
賦三月壬寅高麗王治表乞婚許以駙馬蕭恆德女嫁之甲子
詔安集朔州流民四月甲戌朔各置東邊諸札都監改諸部令

穩為節度使己亥鑿大安山取劉守光所藏錢五月庚戌朔州
威勝軍一百七人叛入于宋六月己丑高麗遣使來問起居後
至無時聞七月丁丑五院部進穴地所得金馬十月丙辰命劉
遂教南京神武軍士劔法賜袍帶錦幣戊午烏昭度乞內附十
一月甲戌詔諸軍官毋非時畋獵妨農回鶻阿薩蘭遣使為子
求婚不許十二月甲寅以南京道新定稅法太重減之甲子幸
南京是年放進士張儉等三人十五年正月庚辰詔諸道勸
民種樹癸未兀惹長武周來降乙未免流民稅二月戊戌勸品
部富民出錢以贖貧民庚子徙梁門遂城秦州北平民于內地
丁巳詔品部曠地令民耕種三月乙丑朔党項來貢乞內附戊
辰募民耕灤州荒地免其租稅十年己巳夏國破宋兵遣使來
告己卯改封繼遷為西平王壬午通括宮分人戶免南京通稅

及義倉粟庚寅兀惹烏昭度以地遠乞免歲時進鷹馬貂皮詔
以生辰正旦貢如舊餘免癸巳宋使來告太宗皇帝崩真宗嗣
位甲午皇太妃獻西邊捷四月乙未朔罷奚王部歲貢鷹戊戌
錄囚壬寅發義倉振南京諸縣民己酉幸南京丁巳致奠于太
宗廟六月壬子夏國遣使來謝封冊七月辛未禁吐谷渾別部
鬻馬於宋辛卯詔南京及平州決滯獄九月庚午幸饒州致奠
太祖廟十月壬辰朔駐蹕驪山罷奚王諸部貢物乙未賜宿衛
時服丁酉禁諸山寺毋濫度僧尼戊戌弛東京道魚鱉之禁戊
申以上京獄訟繁冗詰其主者十一月壬戌朔錄囚高麗王治
薨遣使致祭詔姪誦權知國事丙戌幸顯州謁顯乾二陵是年
放進士陳鼎等二人十六年二月丙午以監門衛上將軍耶
律喜羅為中臺省左相四月癸卯振崇德宮所隸州縣民之被

水者丁未罷民輸官俸給白內帑巳酉祈雨五月甲子祭白馬
神丁卯祠木葉山告來歲南伐乙酉還上京賜婦人年踰九十
者物六月戊子朔致奠于祖懷三陵七月丁巳朔錄囚聽政八
月丁亥朔東幸九月丁巳朔駐蹕得勝口十一月遣使冊高麗
國王誦是年放進士楊又立等二人 十七年七月南侵宋詔
諭諸道九月庚辰朔幸南京癸卯射鬼箭十月癸酉攻遂城不
克遣蕭繼遠攻狼山砦破之次瀛州與宋軍戰擒其將康昭裔
宋順進攻樂壽縣拔之次遂城敵衆臨水以拒縱騎兵突之殺
戮殆盡是年放進士初錫等四人及第 十八年正月還次南
京賞有功將士罰不用命者詔諸軍各還本道六月阻卜叛首
鶻碾弟鐵刺不率衆來附鶻碾無所歸遂降詔誅之十一月甲
戌朔授西平王李繼遷子德昭朔方軍節度使是年放進士南

承保等三人及第 十九年正月辛巳以祇候郎君班詳穩觀
音爲奚六部大王甲申回鶻進梵僧名醫三月乙亥夏國遣李
文貴來貢乙酉西南面招討司奏党項捷四月乙巳幸吳國王
隆祐第視疾五月庚寅以十拽刺詳穩耶律王奴爲乙室大王
辛卯祭天地六月乙巳授康昭裔昭順軍節度使戊午夏國奏
下宋恆環慶三州賜詔褒之八月庚戌達盧骨部來貢九月戊
子駐蹕昌平庚寅西南招討司奏討吐谷渾捷辛卯幸南京十
月巳亥南伐壬寅次鹽溝辛亥射鬼箭壬子祭天地甲寅敗宋
兵于遂城庚申復以黑白羊祭天地丙寅次滿地泥淖班師十
一月丙子宋兵出淤口益津關來侵偵候謀洼虞人招古擊敗
之巳卯觀漁儒門濼閏月巳未減關市稅十二月庚辰免南京
平州租稅 二十年正月癸丑東方五色虹見詔安撫西南面

向化諸部甲寅夏國遣使貢馬駝辛酉女直宰相夸瀉底來貢
 二月丁丑高麗遣使賀伐宋捷三月甲寅遣北府宰相蕭繼遠
 等南伐四月丙寅朔文班太保達里底敗宋兵于梁門乙酉南
 征將校獻俘賜爵賞有差六月夏國下靈州遣劉仁勗來告七
 月辛丑高麗貢本國地里圖九月癸巳朔謁顯陵告南伐捷十
 二月奚王府五帳六節度獻七金山土河川地賜金幣是歲南
 京平州麥秀兩岐放進士邢祥等六人及第二十一年三月
 壬辰詔修日曆官母書細事四月戊辰兀惹渤海與里米越里
 篤越里古等五部遣使來貢耶律奴瓜蕭撻凜奏獲宋將王繼
 忠于望都五月丁巳李繼遷薨遣西上閤門使丁振吊慰丁酉
 阻卜鐵刺里率諸部來降六月修可敦城八月乙酉阻卜鐵刺
 里來朝九月己亥李德昭遣使來謝吊贈癸丑幸女河湯泉改

名松林十月丁巳駐蹕七渡河十一月丙申通括南院部民十
 二月癸未罷三京諸道貢二十二年三月己丑罷番部賀于
 齡節及冬至重五貢乙未李德昭遣使上繼遷遺物七月甲申
 遣使封李德昭為西平王丁亥兀惹蒲奴里剖阿里越里篤與
 里米等部來貢八月庚申阻卜長鐵刺里來朝求婚不許丙子
 駐蹕犬牙山九月己丑諭高麗南伐丙子幸南京女直遣使獻
 所獲烏昭慶妻子丁未致祭太宗廟以北院大王磨魯古太尉
 老君奴監北南王府兵閏月己未南伐癸亥次固安以所獲謀
 者射鬼箭丙寅與宋兵戰于唐興大破之庚午軍于望都十月
 乙酉以黑白羊祭天地丙戌攻瀛州不克甲午下祈州己酉德
 昭遣使謝封冊十一月癸亥馬軍都指揮使耶律課里擊退宋
 兵于涪州丁卯南院大王善補奏宋遣人遣王繼忠書密請求

和詔與使者會許之庚午破德清軍壬申次澶淵蕭撻凜中伏
 斃死乙亥破通利軍丁丑宋崇儀副使曹利用來請和即遣飛
 龍使韓杞持書報聘十二月癸未宋復遣曹利用來以無還地
 之意遣監門衛大將軍姚東之持書往報戊子宋遣李繼昌請
 和歲輸銀十萬兩絹二十萬匹許之遣閣門使丁振持書報聘
 己丑諸軍解嚴是月班師放進士李可封等三人二十三年
 正月戊午還次南京庚申大饗將卒爵賞有差二月丙戌復置
 榷場於振武軍丁巳夏國遣使告下宋青城辛酉以惕隱化哥
 為南院大王都監老君奴為惕隱乙丑振克項部丁丑改易州
 飛狐招安使為安撫使五月乙卯以金帛賜陣亡將士家丙寅
 高麗阻卜烏古女直回鶻鐵驪克項鼻骨德各遣使賀與宋和
 巴亥達旦國九部遣使來聘七月辛酉祭天地丁卯阿薩蘭回

鶻來請先留使者皆遣之九月甲戌遣太尉阿里太傅楊六賀

宋主生辰和後為常不書十月甲午駐蹕七渡河癸卯宋歲幣始至十

一月戊申遣太保合住頒給使韓簡使宋賀正旦辛亥觀漁桑

乾河十二月丙申宋遣周漸等賀千齡節及張若谷等賀正旦

後為常不書二十四年五月壬寅朔幽皇太妃胡輦于懷州賜死因

夫人夸懶于南京餘黨皆生瘞之八月沙州燉煌王曹壽遣使

進大食國馬及美玉九月辛南京是年放進士楊佖等二十三

人及第二十五年正月建中京七月壬申西平王母薨遣使

弔祭并起復李德昭十月丙申駐蹕中京十二月己酉振饒州

饑二十六年五月丙寅高麗遣使賀中京成七月增太祖太

宗讓國皇帝并世宗與李胡諡十月戊子朔幸中京是年放進

士史克忠等一十三人二十七年四月丙戌朔駐蹕中京營

建宮室七月甲寅朔霖雨潢工幹刺陰涼四河皆溢漂沒民舍
八月甲申北幸十一月壬子朔行柴冊禮十二月乙酉南幸辛
卯皇太后崩壬辰遣使報哀于宋夏高麗戊申如中京是歲御
前引試劉二宜等三人二十八年正月辛亥朔不受賀甲寅
如乾陵二月丙戌宋王隨王儒等來弔祭遣蕭虛列張崇濟往
謝蕭合卓致遺物己亥高麗魏守愚等來祭三月癸卯上大行
皇太后諡宋高麗遣使來會葬四月甲子葬乾陵五月己卯朔
如中京辛卯清暑七金山丙午高麗西京留守康肇弑其主誦
擅立主從見詢詔諸道繕甲兵以備東征八月戊申振平州饑
辛亥幸中京丙寅謁顯乾二陵丁卯自將伐高麗遣使報宋九
月乙酉遣使冊李德昭為夏國王辛卯遣樞密直學士高正弘
進使轅札宣問高麗王詢十月丙午朔女直進馬萬匹乞從征

高麗許之王詢奉表乞罷師不許十一月乙酉大軍渡鴨綠江
康肇拒戰敗之退保銅州右皮室詳穩耶律澈魯擒肇及副將
李立追殺數十里獲所棄糧餉鎧仗戊子銅霍貴寧等州皆降
辛卯王詢上表請朝許之禁軍士俘掠以政事舍人馬保祐為
開京留守安州團練使王八副之遣太子太師乙凜將兵送保
祐等赴京壬辰守將車思正殺遼使者韓喜孫等十人領兵出
拒保祐等還遣乙凜領兵擊之思正遂奔西京圍之不克駐蹕
城西高麗禮部郎中渤海陀失來降庚子遣排押盆奴等攻開
京敗高麗兵王詢棄城遁遂焚開京至清江還二十九年正
月乙亥朔班師所降諸城復叛至貴州南峻嶺谷大雨連日霽
乃得渡己丑次鴨綠江庚寅皇后及留守隆祐迎于來遠城壬
辰詔罷諸軍己亥次東京二月己酉謁乾顯二陵以所俘高麗

人分置諸陵廟餘賜內戚大臣三月庚寅南京平州水振之五月甲戌朔詔已奏之事送所司附日曆帳族有罪黥墨依諸部人例六月庚戌升蔚與和州為觀察使不隸武定軍十一月庚午朔幸顯州十二月癸丑置歸寧二州是年御試放高承顏等二人及第

開泰元年正月癸未長白山三十部女直首領來貢乞授爵秩甲申駐蹕王子院丁亥女直太保蒲撚等來朝戊子獵于買曷魯林庚寅祠木葉山辛卯曷蘇館大王曷里喜來朝二月壬子駐蹕瑞鹿原三月乙亥如葦灤丁丑詔封皇女八人為郡主乙酉詔卜日行拜山大射柳之禮命有司具儀物四月庚子高麗遣蔡忠順來降乞稱臣如舊詔壬寅夏國遣使進良馬已酉祀風伯辛酉以前孟父房敝穩蕭佛奴為左舍離畢附

馬蕭紹宗為鄭州防禦使五月戊辰朔詔裴玄感邢祥知禮部貢舉放進士史簡等十九人六月駐蹕上京七月丙子以耶律遂貞為遼興軍節度使遂正為北院宣徽使張昭瑩南院宣徽使耶律受益上京副彰守寇卿留德軍節度使戊寅進士康文昭張素臣郎玄達坐論知貢表邢私曲秘書正字李萬坐上書辭涉怨訕皆杖而徙之八月丙申鐵驪那沙等送兀惹百餘戶至賓州賜絲絹那沙乞賜佛像儒書詔以護國仁王佛像并易詩書春秋禮記各一部賜之己未高麗王詢遣田拱之奉表稱病不能朝十月辛亥如中京十一月甲午朔百官加土尊號日弘文宣武尊道至德崇仁廣孝聰睿昭聖神贊天輔皇帝大赦改元改幽都府為析津府薊北縣為析津縣幽都縣為宛平縣車恩中外己亥賜夏國使東頭供奉官曹文斌呂文貴寶珪祐

守榮武元正等爵有差癸卯前遼州錄事張庭美六世同居儀
 坤州劉典亂四世同居各給復三年十二月丙寅奉遷南京諸
 帝石像于中京觀德殿景宗及宣獻皇后于上京五鸞殿壬申
 振奉聖州饑民癸未劉晨言殿中高可垣中京留守推官李可
 舉治獄明允詔越遷之甲申詔諸道水菑饑民質男女者計備
 錢折盡遣還歸州言其居民本新羅所遷未習文字請設學以
 教允之始詔徵貴德龍化儀坤雙遼同祖七州商稅己丑詔諸
 鎮建宣勅樓二年正月癸巳朔以裴玄感為翰林承旨邢祥
 給事中石川中翰林學士呂德推樞密直學士戶部侍郎劉涇
 加工部尚書蕭紹宗檢校太師耶律控溫加政事令封幽王冊
 封馬氏麗儀耿氏淑儀尚寤白氏以儀尚服李氏順儀尚功艾
 氏芳儀尚儀孫氏和儀己未錄囚是月烏古敵烈叛石皮室詳

穩延壽率兵討之達旦國兵圍鎮州州軍堅守尋引去二月丙
 子詔建麥務川為象雷縣女河川為神水縣羅家軍為崗山縣
 山子川為富庶縣習家砦為龍山縣阿覽峪為勸農縣松山川
 為松山縣金甸子為金原縣四月甲子拜日上京請以韓斌所
 拓贍國從之以捷魯河奉豪等州戶二萬五千四百有奇置長
 霸興仁保和等十縣丙子如緬山七月壬辰烏古敵烈皆復故
 疆乙未西南招討使奏党項諸部前後叛者多投西夏讎遣李
 德昭諭意朕欲西伐爾當東擊毋失犄角之勢仍命諸軍各市
 肥馬丁酉以惕隱耶律滌列為南府宰相太尉五哥為惕隱癸
 卯釣魚曲溝戊申以敦睦宮子錢振貧民丁卯封皇子宗訓大
 內惕隱八月壬戌遣引進使李廷弘賜夏國王及義成公主車
 馬己丑資忠等還十月己未朔改庶井之北丙寅詳穩張馬留

獻女直人知高麗事者上開之自開京東馬行七日有大若廣
等州之南亦有二大若所積如之若大軍行由前路取焉蘇館
女直渡鴨綠江並大河而上至郭州與大路會高帶可取而有
也納之十一月甲午錄囚十二月甲子詔宰相劉晟監修國史以
牛璘為彰國軍節度使放淮于鮮于茂昭等六人及第三年
正月己丑錄囚阻小酋長烏入來朝封為王乙未彗星見西方
丙午畋潢河濱二月戊午詔增樞密使以下月俸三月庚子遣
耶律世良城招州戊申置西京奉聖平尉雲應朔等州轉運使
四月戊午詔南京管內毋造刑獄以妨農務六月甲申封皇姪
胡都古廣平郡王七月壬辰詔政事省樞密院朕常以酒間授
官釋罪母即奉行明日覆奏九月丁酉八部廸烈殺其詳驪稍
瓦皆叛詔南府宰相耶律刺葛招撫之十月丙子以旗鼓搜
刺詳穩題里姑為奚六部上放進上張用行等三十一人及

第出身 四年五月辛巳再伐高麗六月庚戌拜日與麻都骨
世勳易衣馬為好七月又拜日遂幸秋山自八月射鹿至于九
月復自癸丑至于辛酉丁卯與夸离畢兵部尙書蕭榮寧定為
交契以重君臣之好十一月庚申詔汰東京僧命上京中京汴
諸宮選精兵五萬五千人以備東征十二月南巡海徼還幸顯
州 五年正月丁未北幸癸酉駐蹕雪林二月戊戌皇子宗真
生三月辛酉諸道奏獄空詔進階賜物丙寅以前北院大王耶
律敬溫為阿扎割只辛未党項魁可來降四月乙亥振招州民
五月甲子尙書蕭姬隱坐出使後期削其官丁卯以耿元吉為
戶部使六月政事舍人吳克昌按察霸州刑獄八月丙子幸懷
州有事于諸陵十一月辛丑以參知政事馬保忠同知樞密院
事監修國史丁巳以北面林牙蕭隗洼為國舅詳穩將本部兵

東征高麗十二月丁酉賜進士孫傑等四十八人及第六年
二月庚辰南面林牙混合爲南院大王五月戊戌朔又伐高麗
丙午錄囚已酉設四帳都詳穩乙卯祠本棗山黃河乙丑駐蹕
九層臺六月戊辰朔南京奏諸縣蝗先是賜德妃蕭氏死葬兔
兒山西後數日大風起塚上晝暝大雷電而雨不止者踰月七
月辛亥遣禮部尚書劉京翰林學士吳叔達知制誥仇正已起
居舍人程翥吏部員外郎南丞顏禮部員外郎王景運分路按
察刑獄辛酉西南路招討請置寧仁縣于勝州九月庚子皇子
屬思生大赦十月丁卯南京路饑輓雲應朔弘等州粟振之十
一月乙卯建州節度使石匡弼卒七年二月乙丑朔拜日四
月丙寅振川饒二州饑辛未振中京貧乏壬辰以三司使呂德
懋爲樞密副使閏月子子以蕭進忠爲彰武軍節度使兼五州

制置戊午吐蕃王并里尊奏凡朝貢乞假道夏國從之五月丙

寅封皇子宗真梁王宗簡宗偉右衛宗愿左驍衛俱大將軍皇
姪宗元永清軍宗範昭義軍宗熙鎮國軍宗亮絳州俱節度使
宗弼濮州觀察使宗奕宗顯宗蕭皆防禦使八月丙午行大射
柳之禮庚申加平章蕭弘義開府儀同三司尚父兼政事令九
月庚申蒲昵國遣使奏與烏里國封壤相接數侵掠不寧賜詔
諭之庚午錄囚括馬給東征軍十月壬寅以順義軍節度使石
用中爲漢人行宮都部署丙辰復伐高麗諭其守吏能率衆自
歸者厚賞堅壁相拒者追悔無及十一月壬戌以呂德懋知吏
部尚書楊又玄知詳覆院劉晟爲霸州節度使庚辰禁服用明
金縷金貼金十二月蕭排押等伐高麗兵失利遙輦帳詳穩阿
果達客省使酌古渤海詳穩高清明天雲軍詳穩海里等皆死

之是歲放進士張克恭等三十七人及第八年正月壬戌詔
中京建景宗廟封沙州節度使曹順為燉煌郡王二月丁未以
前南院樞密使韓懋為中京留守丙辰祭風伯三月己未以契
丹弘義宮使赫石為興聖宮都部署前通恩拈節度使控骨
里為積慶宮都部署左祇候郎君耶律罕為四捷軍都監乙亥
東征兵將選俱坐失律數其罪而釋之加有功渤海將校官其
有里涅哥二奚軍并南皮室軍校賜金帛有差壬午闕飛龍院
馬癸未回跋部太師踏刺葛來貢丙戌置東京渤海奉官都
知押班五月壬申以駙馬蕭克忠為長寧軍節度使乙亥遷寧
州渤海戶于遼土二河之間己卯曷蘇館惕隱阿不葛宰相賽
刺來貢六月戊子益封征高麗戰歿諸將妻及其子弟錄之己
丑以左夸离畢蕭解里為西南面招討使御史大夫蕭要只為

夸离畢己亥惕隱耶律合葛為南府宰相癸卯弛大擺山猿嶺
採木之禁七月庚申以東北路詳穩耶律獨迭為北院大王癸
亥詔阻卜依舊歲貢馬貂鼠青鼠戊辰觀稼己巳回跋部太保
麻門來貢庚午觀市曲赦市中繫囚九月己巳以石川中叅知
政事壬申至甲戌錄囚庚辰曷蘇館惕隱阿不割來貢十月乙
酉詔諸道事無巨細已斷者每三月一次條奏癸卯以前北院
大王建福為阿札割只甲辰改東路耗里太保城為咸州建節
以領之十一月甲寅置雲州宣德縣十二月辛亥高麗王詢遣
使乞貢方物詔納之九年五月庚午耶律資忠使高麗還王
詢表請稱藩納貢歸所留王人只刺里辛未遣使釋王詢罪並
允其請癸酉以耶律宗教檢校太傅宗誨啓聖軍節度使劉晟
太子太傅仍賜保節功臣七月庚戌朔日食以近臣代拜救護

甲寅遣使賜燉煌郡王曹順衣物九月戊午以蕭紹宗同平章
事乙亥曹順遣使來貢丙子以夸离畢延寧爲兵馬副都部署
總兵東征括諸道漢民馬給之十月戊寅以涅里爲奚王都監
突迭里爲北王府舍利軍詳穩郎君老使沙州還詔釋宿累使遠國多用犯罪有才略者使還卽除其罪戊子西南招討奏党項部有宋犀族輸
貢不時宜以時遣使督之壬寅大食國遣使進象及方物爲子
冊割請婚詔封王子班郎君胡思里女可老爲公主嫁之十一
月丁巳以漆水郡王韓愬爲南京留守析津尹兵馬都總管已
未以夸离畢蕭孝順爲南面諸行宮都部署加左僕射十二月
戊子詔中京建太祖廟制度祭器皆從古制乙巳放進士張仲
舉等四十五人

太平元年三月戊戌皇子勃已只生庚子賜駙馬蕭紹業私城

名睦州軍曰長慶四月戊申東京留守奏女直三十部部長請
各以其子詣闕祇候詔以其父俱來受約乙卯錄囚丁卯置萊
州七月甲戌朔賜從獵女直人秋衣乙亥遣骨里取石晉所上
玉璽于中京十月丁未敵烈部長頗白來貢馬駝戊申錄囚已
未以薩斂解里爲都點檢高六副點檢耶律羅漢奴左皮室詳
穩曩姑右皮室詳穩聊了西北路金吾耶律僧隱御史大夫求
哥駙馬蕭春骨里並大將軍庚申幸通天觀觀魚龍曼衍之戲
翌日再幸還升玉輅自內三門入萬壽殿奠酒七廟御容因宴
宗室十一月癸未上御昭慶殿百僚奉冊上尊號曰睿文英武
遵道至德崇仁廣孝功成治定昭聖神贊天輔皇帝大赦改元
中外官進級有差宋遣使來聘夏高麗遣使來貢甲申冊皇子
宗真爲皇太子 二年三月地震雲應二州屋摧地陷鬼白山

裂數百步泉湧成流丁丑宋使薛貽廓來告真宗皇帝崩仁宗
 嗣位遣都點檢耶律僧隱等充祭奠使副林牙蕭日新觀察馮
 延休充宋后弔慰使副金吾耶律諧領引進姚居信充宋主弔
 慰使副戊子為宋主飯三京僧五月乙亥朔石川中薨庚辰鐵
 驪遣使獻兀惹十六戶六月乙未宋遣使薛由等致遺物七月
 己卯以耶律信寧為奉陵軍叅政王同顯靜海軍耶律遂忠長
 寧軍耿延毅昭德軍高守貞河西軍俱節度使九月癸巳遣尚
 書僧隱韓格賀宋主即位壬寅遣堂後官張克恭賀夏國王李
 昭德生日耶律掃古韓王充賀宋太后生日使副耶律仙寧史
 克忠充賀宋正旦使副以後不書十月癸卯朔賜宰臣呂德懋馬保
 忠叅政吳叔達樞副楊又玄錢物有差辛亥至上京赦囚十一
 月丙戌宋遣使來謝十二月辛丑高麗王詢薨遣使冊其子欽

嗣王是年放進士張漸等四十七人三年正月丙寅朔以僧

隱為平章事乙亥以蕭臺德為南王府都監林牙耶律信寧西
 北路招討都監辛巳賜越國公主私城名懿州軍曰慶懿二月
 丙申以丁振為武信軍節度使改封蘭陵郡王四月以耶律守
 寧為都點檢六月戊申以南院宣徽使劉涇叅知政事蕭孝惠
 為都點檢蕭孝恭東京統軍兼沿邊巡檢使戊午以蕭連為左
 奇離畢蕭琳為詳穩七月戊寅以南府宰相耶律合葛為上京
 留守封漆水郡王丁亥賜緬山名曰永安十月庚辰東征軍奏
 統帥諧領常察謀奴率師自毛母國嶺入林牙高九裨將大匡
 逸等率師鼓山嶺入閏月未至撻離河不遇敵而還以是月會
 於弘怕只嶺駝馬死者甚衆十一月辛卯朔以皇姪宗範為歸
 德軍節度使同平章事封三韓郡王南京留守韓愬為南院大

王兵馬都總管仇正燕京轉運使仇道衡中京副留守馮延休
順州刺史郎玄化西山轉運使趙其樞密直學士蕭承太子太
師四年三月戊子千齡節詔賜諸宮分耆老食四月癸酉以
右丞相馬保忠之子世弘使嶺表至平地松林爲盜所殺特贈
昭信軍節度使六月己未韓愬薨追封陳王戊辰以鄭弘節爲
兵部郎中甲戌以蕭解里爲彰德軍節度使八月丙辰以都點
檢蕭紹宗爲武定軍耶律宗福安國軍俱節度使十二月以蕭
從政爲歸義軍節度使康筠監門衛是年放進士李炯等四十
七人五年三月壬辰以鄭弘節爲臨潢少尹楊又玄吏部尚
書叅知政事兼樞密使駕如長春河魚兒濼有聲如雷其水一
夕越沙岡四十里別爲一陂五月以蕭從順爲太子太師吳叔
達翰林學士道士馮若谷加太子中允耶律晟武定軍節度使
呂士宗禮部員外郎李可舉順義軍節度使十一月庚子幸內
果園宴京民聚觀放進士得七十二人命賦詩第其工拙以張
昱等一十四人爲太子校書郎韓繼等五十八人爲崇文館校
書郎辛丑以左祇候郎君詳穩蕭羅羅爲右夸离畢十二月丁
巳以耶律仁舉爲典國軍節度使甲子蕭守寧爲侍衛親軍馬
步軍都點檢十二月戊辰以北府宰相蕭普古爲北院樞密使
叅知政事劉京爲順義軍節度使是歲燕上大豐遇車駕臨幸
禮高年惠鰥寡賜脯飲至夕六街燈火如晝士庶嬉遊上亦微
行觀之民爭獻土物六年二月己酉以米離巴同知樞密院
黃翮爲兵馬都部署達骨只副之赫石爲都監引軍城混同江
疎木河之間黃龍府請建堡障燧臺下詔以農隙築之戊午
以耶律野爲副點檢國房帳蕭柳氏徒魯骨領西北路十二班

軍奚王府舍利軍已巳南京水遣使振之庚午詔究項別部塌
西設契丹節度使治之三月戊寅叅知政事吳叔達責授將作
少監出爲東州刺史四月丁未朔以武定軍節度使耶律漢古
爲惕隱十月丙子曷蘇館諸部長來朝庚辰遣使問夏國與宋
交戰之故辛巳以前南院大王直魯袞爲烏古敵烈都詳穩庚
寅蕭孝順蕭紹宗兼侍中駙馬蕭紹業平章政事前南院大王
胡覲革同知上京留守安哥通化州節度使十二月庚辰曷蘇
館部乞許建旗鼓辛巳詔北面諸部兼察州縣石烈彌里不治
者罷之大小職官有貪暴殘民者終身不錄其不廉直雖處重
任卽令代去能清勤自持者在卑位亦當薦拔及內族受賂事
發與常人所犯同科 七年正月辛亥以女直白縷爲惕隱蒲
馬爲巖母部太師五月從西南路招討司奏陰山中產金銀徒

置礦冶復遣使循遼河源求產金銀之所六月禁諸屯川不得

擅貨官粟癸巳詔蕭惠再討阻卜七月巳亥朔詔更定法令十

月丁卯朔詔諸帳院庶孽並從其母論貴賤十一月癸亥以三

韓王欽爲啓聖軍節度使十二月癸酉以金吾蕭高六爲奚舍

利軍詳穩 八年正月庚申党項侵邊破之甲子詔州縣長吏

勸農七月丁酉以遙輦帳郎君陳哥爲西北路巡檢與蕭諧領

同管二招討地九月壬辰朔以渤海宰相羅漢權東京統軍使

壬子幸中京賜北敵烈部節度使耶律延壽旗鼓巡視諸部癸

丑阻卜別部長胡懶來降乙卯阻卜長春古來降十月詔燕城

將士若敵至總管備城之東南統軍守其西北馬步軍備野戰

統軍副使繕壁壘課士卒各練其事十一月丙申以耶律求翰

爲北院大王十二月辛酉朔以遙輦太尉謝佛留爲天雲詳穩

壬申前北院大王耶律留寧爲雙州節度使康筠崇德宮都部
署謝十永興宮都部署旅墳宜州節度使耶律野中京留守同
知耶律曷魯突媿爲大將軍丁丑詔庶孽雖已爲良不得預世
選兩國舅及南北王府國之貴族賤庶不得任本部官是歲放
進士張宥等五十七人 九年二月戊辰遣使賜高麗王欽物
八月己丑東京舍利軍詳穩大延琳友渤海太保夏行美不從
其招趨拜平章事十月丙戌朔命蕭孝穆等討之十一月丙寅
授瀋州節度副使張傑爲節度使是歲放進士張人紀趙睦等
二十二人 十年四月以耶律行平爲廣平軍節度使李延弘
知易州蕭從順加太子太師八月丙午延琳就擒渤海平十一
月辛亥以前統軍委察大將軍馬保忠權知燕京留守奚王府
都監蕭阿古軫爲東京統軍使詔渤海舊族有勲勞材力者叙
用餘分居來隰遷聞等州十二月乙巳尚書左僕射蕭琳爲臨
海軍節度使 十一年三月帝不豫五月大雨水諸河橫流皆
失故道六月丁丑朔駐蹕大福河之北己卯帝崩于行宮年六
十一景福元年閏十月壬申上尊諡曰文武大孝宣皇帝廟號
聖宗 舊史贊曰聖宗幼冲嗣位政出慈闈及宋人三道來攻
親御甲冑一舉而復燕雲破信彬再舉而躡河朔不亦偉歟既
而侈心一啓佳兵不祚東有茶陀之敗西有甘州之喪此狃於
常勝之過也然其踐阼四十九年理冤滯舉才行察貪殘抑奢
僭錄死事之子孫振諸部之貧乏貴迎合不忠之罪却高麗女
樂之歸遼之一代在位長久庶幾可稱者聖宗一人而已

弘簡錄卷二百五
樂之亂遂之矣升介介其於忠與河洛書匪宗為人而其
帶劍玉珥之汗燕燕精精之食之貴賤介不忠之罪高其
帝劉之嚴也然其組刑四十七年非匪流雷取許察命參賦
而心一吾卦其不派東洋茶到之類西許其世之齊北其
賊喻甲其十舉而與燕雲如許淋再舉而繼而應不衣前
聖宗則齊與贊田聖宗與耶律如出慈閣又宋人三並來
十一景肅示平問十八壬申中食益曰文先大者宜皇帝
尖姑魯六凡不其賊魏魏天派西文北日甲帝也平許宮
燕軍前與趙統十一年三月帝不難五月大河水清所對
用翰衣母來繼繼用善德平立其也日曲善也對根蕭棟為滿

弘簡錄卷二百五

明刑部員外郎仁和弘齋邵經邦學

皇清翰林院侍講學士四世孫遠平校閱

載記 遼主之七

興宗皇帝諱宗真字夸不董小字只骨聖宗長子幼而聰明長
而魁偉龍顏日角豁達大度善騎射好儒術通音律三歲封梁
王冊為皇太子太平十年六月判北南院樞密使事聖宗崩即
位柩前壬午尊母元妃蕭氏為皇太后甲申遣使告哀于宋及
夏高麗辛卯大赦改是年為福元年乙未奉大行皇帝梓宮
殯于永安出太平殿辛丑遷齊天皇后于上京七月丙午朔高
麗遣使弔慰上召晉王蕭普古等飲博夜分乃罷丁未擊鞠戊
申以特末里為左祇候橫帳樂古權右祇候俱郎君詳隱己酉

以耶律鄭留為千厥廸烈都詳穩高八為右皮室詳穩庚戌振
薊州民饑甲寅錄囚以觀察姚居信為上將軍建慶州于慶陵
之南徙民實之充奉陵邑丁巳詔寫大行皇帝御容上謁哀慟
久之置御容殿併寫蕭孝先孝穆像于殿側以蕭阿姑軫為東
京留守丁卯謁太平殿凡先帝所御弓矢鞍勒皆焚之戊辰幸
晉王普古第視疾壬申上謁神主帳時與隈蕭氏始入宮亦命
拜之八月壬午遷大行皇帝梓宮於菽塗殿九月戊申躬視慶
陵庚戌問安皇太后辛亥宋遣王隨曹儀致祭王禮許懷信弔
慰范諷孫繼業賀卽位庚申夏國遣使來慰并賻庚午喪服臨
菽塗殿受宋使弔祭甲戌遣御史中丞耶律翥司農卿張確詳
穩耶律勵四方館使高維翰謝宋弔祭十月戊寅宰臣呂德懋
薨丙戌遣工部尚書高德順崇祿卿李可封致遺物于宋右監

門衛上將軍耶律元載引進使魏永往謝卽位戊戌以蕭革趙

為宋耶律郁馬保業充來歲賀宋正旦使以後不書閏月辛亥謁菽

塗殿闕玄宮闕器從有司請立生辰為永壽節辛酉閱親造鎧

甲丁卯振黃龍府饑十一月壬辰上率百僚奠于菽塗殿焚素

所服御玩好并縱五坊鷹犬甲午葬慶陵乙未祭天地丙申謁

慶陵以遺物賜羣臣名其山曰慶雲殿曰望仙十二月癸丑皇

太后聽政帝不親庶務羣臣表請不從是歲以興平公主下嫁

夏國王李德昭子元昊封為夏國公駙馬都尉

重熙元年正月壬申皇太后御正殿受帝與羣臣朝宋遣任布

王遵範來賀乙亥宋遣鄭向郭遵範來賀永壽節以後不書丁丑如

雪林二月大蒐三月壬申朔皇太后誣齊天皇后以罪遣人卽

上京行弒四月乙巳清暑別輦斗七月獵平地松林以後不書八月

丙午駐蹕刺河源皇子洪基生十月己酉幸中京十一月己卯
帝率羣臣上皇太后尊號禮畢羣臣上帝尊號曰文武仁聖昭
孝皇帝大赦改元丙戌夏國遣使來賀辛卯五國部長來貢夏
國王李德昭薨冊國公元昊爲其國主十二月庚戌以耶律求
翰同平章事是年放進士劉師貞等五十七人二年正月乙
酉夏元昊初嗣位遣使來貢壬辰女直詳穩臺押率所部來貢
宋遣曹瑋來告太后劉氏哀章得象安繼昌致遺物隨遣廷昌
宮使耶律壽寧給事中知制誥李奎充祭奠使副天德軍節度
使耶律卿寧大理卿和道亨河西軍節度使耶律嵩引進使馬
世卿充兩宮弔慰使副八月乙卯遣使閱諸路禾稼十一月甲
申宋遣劉保符忠李昭述張茂實來謝慰奠十二月己酉禁夏
國使沿路私市金鐵三年二月壬辰以北院樞密使蕭普古
爲東京留守戊申耶律大師奴有禮祿恩詔入屬籍四月皇太
后還政于上躬守慶陵六月己亥蕭普古改南院樞密使七月
戊子朔上始親政四年正月庚寅如耶述只里部振之六月
癸丑朔皇子寶信奴生十一月壬午改南京總管府爲元帥府
乙酉行柴冊禮于白嶺大赦加尚父耶律信寧政事令耶律求
翰耆宿贊翊功臣十二月癸丑詔諸軍砲弩弓劍手以時閱習
五年正月從樞密使蕭延寧請改國舅乙室小功帳敝史爲將
軍四月甲子幸后弟蕭無曲第曲水泛觴賦詩丁卯頒新定條
制己巳擊鞠五月庚申幸北院大王高十行帳拜輿賜銀絹壬
戌詔修南京宮闕府署七月辛丑錄囚耶律把八誣其弟韓哥
謀殺當反坐其弟泣訴憫而從之九月癸巳獵黃花山獲熊三
十六賞獵人十月丁未幸南京曲赦析津府境內囚壬子御元

和殿賜進士馮立趙徽四十九人及第 六年五月己酉以蕭
把哥爲左夸離畢郎君詳穩鼻姑得爲林牙簽北面事耶律涅
哥同簽點檢司甲寅錄囚以南大王耶律信寧故匿重國及侍
婢皆論死已而貸之庚申出飛龍廐馬賜皇太弟重元及北南
面侍臣有差癸亥以上京留守胡覩袞爲南大王平章事上親
爲製誥詞并賜詩以寵之甲子蕭查刺寧爲上京留守侍中管
寧行宮都部署耶律蒲奴寧烏古廸烈得都詳穩六月壬申朔
以善寧爲殿前都點檢蕭阿刺里耶律烏魯幹蕭特里蕭求翰
爲各宮都部署上酒酣賦詩蕭孝穆蕭八撒等皆屬和夜中乃
罷已卯祀天地七月辛丑朔北南樞密使奏獄空賞賚有差八
月北樞密奏越棘等五國民苦其酋師不法多致流亡詔罷之
領以契丹節度使一員十一月辛亥蕭惠管寧並爲南院樞密

使蕭掃古諸行宮都部署耶律裏里知南面行宮副部署蕭阿
刺里左祇候耶律曷主右祇候俱郎君詳穩庚申封皇子洪基
爲梁王 七年二月壬午幸五坊閱鷹鵠三月甲寅錄囚四月
己巳興平公主與夏國元昊不睦薨遣承旨耶律庶成持詔詰
問六月乙亥御清涼殿試進士賜邢彭年以下五十五人第七
月乙巳阻卜部長屯禿吉斯來朝十月甲子朔渡遼河丙寅駐
蹕白馬淀十二月名東京善鞠者數十人與近臣角勝上臨觀
之己巳北府宰相撒八寧知東京留守事耶律應穩南府宰相
查割折大內惕隱乙室已帳蕭翰乾州節度使三子帳冠哥轉
郎君詳穩鉏窘大王平州節度使宰臣張克恭守司空甲申致
薦慶陵丁亥錄囚非故殺者減科南面侍御壯骨里詐取女直
貢物罪死上以有吏能踪而流之 八年正月戊戌振品部丁

已禁朔州鬻羊于宋六月乙丑詔括戶口七月丁巳謁陵致
奠于望仙殿至顯州謁園陵踰月還京十一月詔有言北院處
事失平擊鍾及邀駕告者悉以奏聞已酉城長春九年正月
丙辰朔上進酒于皇太后宮御正殿七月癸酉宋遣郭禎以伐
夏來報遣樞密使杜防報聘十一月甲子女直侵邊發黃龍府
鐵驪軍拒之十二月辛卯以所得女直戶置肅州詔諸犯法者
不得爲官吏諸職官非婚祭不得沉酗廢事有治安邊之略者
悉具以聞十年二月庚辰朔詔蒲盧毛朶部歸曷蘇館戶之
沒入者使復業甲申從北院樞密言南北二王府洎諸部節度
侍衛祇候郎君皆出族帳旣免與民戍邊其祇候事請亦以部
曲代行四月罷修鴨綠江浮梁及漢兵屯戍之役九月癸亥上
獵馬盂山丙寅夏國獻宋俘十月庚寅以女直大師臺押爲曷

蘇館都大王辛卯皇子胡盧幹里生肆赦北宰相撒八寧迎車
駕至其第飲宴角觥爲樂壬辰飲皇太后殿夕復引公主駙馬
及內族大臣入寢殿劇飲甲午幸中京庚子以駙馬都尉蕭忽
列爲國舅詳穩十二月乙未置撻朮不姑部長以胡撻刺爲平
章事是歲謀取宋舊割關南十縣地遣蕭英劉六符使宋丁酉
議伐宋詔諭諸道十一年正月庚戌遣蕭特末劉六符使宋
取晉陽及瓦橋以南十縣地且問興師伐夏及沿邊疏濬水澤
增益兵戍之故四月甲戌朔頒南征賞罰令六月乙亥宋遣富
弼張茂實奉書來聘以書荅之壬午御含涼殿放進士王寔等
六十四人七月壬寅朔詔外路官勤瘁正直者考滿代不治事
者卽易之八月丙申宋復遣富弼張茂實奉書來聘乞增歲幣
銀絹以書荅之上感其言深切九月壬寅復遣耶律仁先劉六

符使宋約和議始定閏月癸未仁先遣人還報宋歲增銀絹十萬匹兩文書稱貞送至白溝上喜宴羣臣于昭慶殿命振恤三父族之貧者辛卯仁先六符還進宋誓書十一月丁亥羣臣加上尊號曰聰文聖武英略神功睿哲仁孝皇帝大赦十二月辛亥詔蠲預備伐宋諸部租稅一年壬子吐渾党項鬻馬夏國詔謹邊防己未宋遣賀正旦及永壽節使居邸帝微服往觀丁卯禁喪葬殺牛馬及藏珍寶十二年正月辛未遣析津府同知耶律敵烈樞密院都承旨王惟古諭夏國與宋和壬申以耶律遼晒為東京留守二月壬寅禁關南漢民弓矢已酉夏國高麗遣使來賀尊號甲寅夏國使還奏元昊罷兵遣使報宋四月己亥置回跋部詳穩都監五月乙未詔復定禮制六月丙午詔世選宰相節度使族屬及身為節度使之家許葬川銀器仍禁殺牲以祭庚戌詔漢人官分戶絕恆產以親族繼之辛亥阻卜大子屯秃古斯弟太尉撒葛里來朝七月庚寅夏國遣使表請伐宋不從八月丙申謁慶陵九月壬申朝皇太后謁望仙殿壬午謁懷陵十月庚子詔諸路上重囚遣官詳讞壬子夏人侵党項遣延昌宮使高家奴讓之甲子惕隱敵魯古封漆水郡王丁卯出飛龍厰馬分賜羣臣十一月丁亥上京歲儉復其民租稅十二月戊申改政事省為中書省十三年正月甲子朔朝皇太后二月丙辰置契丹警巡院四月甲寅南院大王耶律高十奏党項等部叛附夏國西南招討都監羅漢奴等亦奏山西郡族節度使屈烈以五部叛亦如之五月壬戌朔羅漢奴所發部兵與党項戰不利招討使蕭普達四捷軍詳穩張佛奴歿于陣夏國來援叛黨戊辰詔徵諸道兵會西南邊以討李元昊六月甲

午阻卜部長烏八遣其子執夏所遣援兵衆邑改來乞以兵助戰從之乙未遣廷昌宮使耶律高家奴告宋將伐夏七月庚辰夏國遣使來朝責不以情羈之八月丁巳夏復遣使來詢事宜又不實對答之九月戊辰宋以親征夏國遣余靖致贐禮壬申會大軍于九十九泉以皇太弟重元北院樞密使蕭惠將先鋒兵十月庚寅祭天地丙申獲党項偵人射鬼箭丁酉元昊上表謝罪欲收叛黨以獻從之辛亥元昊親率党項三部來進方物詔北院樞密副使蕭革逐之且詰其納叛背盟元昊伏罪許以自新賜酒遣之壬子軍于河曲召羣臣議皆以大軍旣集宜加討伐癸丑掩殺數千衆夏人囚執駙馬蕭胡覩丁巳夏以先被執者來歸詔亦遣還所留夏使十一月辛酉賜有功將校甲子班師丁卯改雲州爲西京辛巳朝皇太后十二月戊申胡覩來歸是夏詔耶律谷欲都林牙燕成等編集國朝上世以來事蹟十四年正月壬午以金吾衛大將軍敵魯古爲乙室大王二月庚子朝皇太后駐蹕撒刺濼三月己卯宋遣使來賀伐夏師還閏五月丁卯謁慶陵己卯阻卜大王屯禿古斯率諸部長來朝辛亥錄戰歿常侍斡直得子習羅爲帥十月甲子望祀木葉山十二月癸丑觀漢軍習砲射擊刺癸亥決滯獄十五年二月丙寅蒲盧毛朶界曷懶河戶來附詔撫之三月甲申詔諸道歲具獄訟以聞四月戊午還遙輦帳戍軍壬戌以北女直詳穩蕭高六爲奚六部大王甲戌蒲盧毛朶曷懶河百八十戶來附六月戊辰御清涼殿賜進士王棠等六十八人甲戌西北路招討使耶律敵魯古坐賊免官七月戊子覩獲乙未以北院宣徽使旅墳爲左夸离畢丙申籍諸路軍辛丑禁扈從踐民田丁未

女直部長遮母率衆來附加太師八月癸丑高麗王欽薨十月
丁亥轉旅墳惕隱封遼西郡王己亥渤海部以契丹戶例通括
軍馬乙巳振南京貧民十二月壬申以先帝在時生辰開赦徒
以下十六年二月辛酉禁羣臣遇宴樂奏請私事詔世選之
官從各部耆舊擇材能用之三月癸巳遣使審決雙州囚壬
寅大雪六月丁巳阻卜大王屯秃古斯來朝獻方物戊午詔士
庶言事七月辛卯幸慶州自是月至九月日射獵于楚不溝
霞列繫輪石塔諸山十月辛亥幸中京謁祖廟庚午鐵驪仙門
始來朝貢加右監門衛大將軍十一月戊寅祠木葉山己丑朝
皇太后減雜犯以下死罪一等徒以下免十七年閏正月癸
丑射虎于候里吉二月辛巳振搖穩喇穩部詔士庶言國家利
便不得及已事奴婢所見許自其主不得自陳夏國來告其主
元昊薨遣使慰奠三月丙午夏遣使上遺留物丁卯鐵不得國
使來乞以本部軍助攻夏國不許四月甲申蒲盧毛朶部大王
蒲輦來獻造舟人匠六月庚辰阻卜獻馬駝二萬辛卯長白山
太師柴葛回跋部太師撒刺都來貢方物七月丁未于越摩梅
欲之子不葛一及婆離八部夸离董虎馘等內附甲寅錄囚減
雜犯以下死罪八月丙戌復南京貧戶租稅戊子伐蒲奴里十
一月乙未朔遣使括馬十八年正月戊戌留夏國賀正使不
遣己亥遣蕭惟信告宋伐夏辛丑錄囚丙辰獵霸特山三月丁
巳烏古遣使送款五月甲辰五國部長各率其部來附庚戌回
跋部長兀迭臺扎等來朝六月乙丑錄囚丙寅行十二神齋禮
己巳宋遣錢逸致伐夏燼禮庚辰阻卜貢馬駝珍玩辛巳夏使
來貢留不遣丁亥行再生禮七月戊戌親征八月辛酉渡河夏

人遁乃還九月丁未蕭惠等與夏人戰而敗都詳穩蕭慈氏奴
南尅耶律幹里死焉十月北道行軍都統耶律敵魯古率阻卜
諸軍至賀蘭山獲元昊妻及其官僚家屬十二月戊寅慶陵林
木火已卯錄囚有弟從兄爲強盜者兄弟俱無子特原其弟
十九年正月庚寅加僧惠鑑檢校大尉庚子復封敵魯古漆水
郡王諸將校及阻卜等部部長各進爵有差辛丑遣使問罪夏
國二月丁亥夏將洼普猥貨乙靈紀等來攻金肅城林牙高家
奴等破之洼普被劊遁去殺猥貨乙靈紀四月壬申蒲盧毛朶
部惕隱信篤來貢五月丁酉夏將洼普來降六月丙辰朔置倒
塌嶺都監丙寅謁慶陵大安殿壬申回跋曷蘇館蒲盧毛朶部
各遣使貢馬辛巳御金鑾殿試進士七月乙未阻卜部長豁得
刺遣弟幹得朝貢加太尉遣之戊戌錄囚戊申以左夸离畢蕭

唐古爲北院樞密副使八月丁卯阻卜部長喘只葛拔里斯來
朝九月壬寅夏人侵邊敵魯古遣六院軍將海里擊敗之十月
辛未夏國王李諒祚母遣使乞依舊稱藩詔諭別遣信臣詣闕
當徐思之壬申釋臨潢府役徒十一月庚戌錄囚二十年二
月甲申遣前北院都監蕭友拔等使夏國索党項叛戶五月癸
丑友拔等還諒祚母表乞如党項權進馬馳牛羊等物己巳夏
復遣使求唐隆鎮及乞罷所建城邑以詔荅之六月丙戌以所
獲元昊妻及所俘夏人安置蘇州遣所獲夏物于宋九月詔更
定條制十月己卯朔括諸道軍籍十一月庚申以惕隱都監蕭
漢魯爲左夸离畢甲子命東京留守司總領戶部內省事丁卯
罷中丞記錄職官過犯令丞旨總之二十一年七月甲辰朔
召宰相蕭塔烈葛貼不樞密蕭革仁先等賜坐論古今治道戊

中祀天地已酉詔北南樞密院日再奏事壬子追尊太祖之祖
 曰簡獻皇帝廟號元祖妣簡獻皇后太祖父宣簡皇帝廟號德
 祖妣宣簡皇后追封太祖伯父巖木為蜀國王釋魯為隋國王
 癸亥近侍小底盧寶偽學御書免死配役終身八月戊子太尉
 烏者薨詔配享聖宗廟九月庚申追上太祖以下諸帝后諡號
 十月丁亥夏國李諒祚遣使乞弛邊備即遣蕭友括奉詔諭之
 戊戌射虎于南撒葛栢十一月壬寅朔增諡讓國皇帝以下諸
 帝后諡號甲子回鶻阿薩蘭遣使貢名馬文豹丙寅錄囚
 十二年二月丙子回鶻阿薩蘭為隣國所侵遣使求援五月壬
 寅詔內地州縣植果七月已酉阻卜大王屯禿古斯率諸部長
 獻馬駝閏月癸巳長春州置錢帛司九月壬辰夏國遣使進降
 表乞進馬駝甲午遣南面林牙高家奴等奉詔撫諭十月丙申

朔日食十二月壬子詔大臣朕與宋主約為兄弟歡好歲久欲
 見其繪像可諭來使二十三年正月戊子夏國遣使貢方物
 甲午獵盤直坡四月癸丑獵合只忽里六月壬寅高麗王徽請
 官其子詔加檢校太尉七月已巳諒祚來求婚已卯詔八房族
 巾幘九月庚寅獵遇三虎縱大獲之十月戊戌幸新建祕書監
 辛丑有事于祖廟癸丑以開泰寺鑄銀佛像而赦在京囚十一
 月壬申帝率羣臣上皇太后尊號甲申羣臣上尊號曰欽天奉
 道祐世典曆武定文成聖神仁孝皇帝大赦內外官進級有差
 癸未錄囚二十四年正月戊辰朝皇太后辛巳宋遣使來賀
 并饋馴象二月已丑朔召宋使釣魚賦詩甲寅夏國遣使來賀
 五月駐蹕南崖七月次南崖之北峪不豫八月丁亥疾大漸召
 燕趙國王洪基諭以治國之要戊子大赦縱五坊鷹鶻焚釣魚



之具已丑崩于行宮年四十清寧元年十月庚子上尊諡爲神聖孝章皇帝廟號興宗舊史贊曰興宗卽位年十有六不能厚嫡母而尊其母臨朝專政賊殺不辜又不能以禮幾諫使齊天死於弑逆以至大行在殯飲酒博鞠俱非王者孝道及訥遺像而哀慟愛宋弔而衰絰跡其所爲若出二人當時無大人進言一賢薦舉祇能感富弼之言遂申南宋之好許諒祚之盟終罷西夏之兵兼以求治甚切親策進士大修條制下至士庶得陳便宜雖未可匹休古之帝王在當時邊塵不驚享國長久亦庶幾晏安者矣

載記 遼主八之上

道宗皇帝諱洪基字涅鄰小字查剌興宗長子初封梁王重熙十一年追封燕國王總領中丞司事十二年加尚書令總北南院樞密使事進封燕趙國王十八年三月壬子疾愈赦雜犯死罪以下十九年七月癸巳領北南樞密院二十一年拜天下兵馬大元帥知惕隱事參預朝政性沉靜嚴毅每朝上爲歛容奉遺詔卽位柩前哀慟不聽政辛卯百僚上表固請許之仍詔士庶直言無諱可則擇用否亦不以爲愆癸巳遣使報哀于宋及夏高麗辛丑改是年爲清寧元年大赦九月戊午詔常所幸圍塲外母禁庚申詔除護衛士外不得佩刃入宮非勲戚後及夸尙董副使承應諸職事人不得冠巾壬戌詔夸尙董及副使之族并民奴賤不得服駝尼水獺裘刀柄兔鶻鞍勒珮子不許用犀玉骨突犀惟大將軍不禁乙丑賜內外臣僚賞有差庚午尊皇太后爲大皇太后皇后爲皇太后辛未遣左夸尙畢蕭謨魯翰林學士韓運致遺物于宋及賜高麗夏國癸酉遣使報宋卽

位丙子改上京留守宿國王陳留爲南京留守陳主塗宇特爲
南府宰相進封吳王十月從有司請立生日爲天安節壬寅以
順義軍節度十神奴爲南院大王十一月甲子葬慶陵宋及高
麗遣使來會名其山曰永興壬申次懷州有事于太宗穆宗廟
甲戌謁祖陵戊寅冬至有事於太祖景宗與宗廟不受賀十二
月丙戌詔左夸离畢朕嗣位已數月未見所以副朕委任股肱
耳目之意其令內外百官比秩滿各言一事仍轉論所部無貴
賤老幼皆得直言無諱戊子冊妃蕭氏爲皇后辛卯詔部署院
事有機密卽奏其投謗訕書輒受及讀者並棄市癸巳皇族十
公悖母伏誅甲午以翰林學士吳湛爲樞密副使樞密同知韓
紹文爲上京留守丙申宋遣歐陽脩等來賀卽位戊戌詔設學
養士願五經傳疏置博士助教各一員是年御清涼殿放進士

張孝傑等四十四人 二年正月丙辰詔州郡官及僚屬決囚

如諸部族例已巳詔二女古部與世預宰相節度使之選者免
皮室軍二月乙酉以蕭謨魯知西南面招討都監事乙巳以先
帝在時生辰宴羣臣命各賦詩三月己卯御製放鷹賦賜羣臣
諭任臣之意閏月己亥始行東京所鑄錢乙巳南京奏獄空進
留守以下官四月甲子詔方夏長養烏獸孳育之時不得縱火
於郊五月戊戌謁慶陵甲辰有事于興宗廟六月丁巳詔宰相
舉才能之士戊午命有司籍軍補邊戌辛未罷史官預聞朝議
俾問宰相而後書乙亥中京蝗乙酉遣使分道平賦稅繕戎器
勸農桑禁盜賊九月庚子幸中京祭聖興二宗於會安殿十一
月戊戌知左夸离畢耶律劃里爲北院大王甲辰文武百僚上
尊號曰天祐皇帝大赦百官進遷有差十二月戊申朔以陳留

為北府宰相 三年正月乙未五國部長來貢方物五月己亥
如慶陵獻酎六月辛未以蕭唐古為南府宰相七月甲申南京
地震赦其境內十月己酉謁祖陵及讓國皇帝世宗廟十一月
丙子以蕭謨魯為契丹行宮都部署十二月己巳太皇太后崩
四年正月壬申朔遣使報哀于宋夏癸酉宋遣使奉其主繪像
來丁亥知易州事耶律頗得秩滿許部民乞留二月丙午詔諸
路鞫死罪獄雖具仍令別州縣覆案無寃然後決之稱寃者卽
具奏聞三月戊寅募天德鎮武東勝等處勇捷者籍為軍甲午
肆赦四月丁卯宋遣使弔祭五月庚午朔上大行太皇太后尊
諡癸酉葬慶陵夏國高麗遣使來會七月辛巳制諸掌內藏庫
官十一月癸酉行再生及柴冊禮宴羣臣於八方坡庚寅御清
風殿受大冊禮大赦壬午謁太祖及諸帝宮丙戌祠木葉山禁
造玉器十二月辛丑弛馳尼水獺裘之禁是歲皇子濬生 五
年七月丁酉烏古敵列詳穩蕭謨魯為左夸离畢十月壬子朔
幸南京祭典宗於嘉寧殿十一月禁獵十二月壬戌以北院林
牙奚馬六為右夸离畢叅知政事吳湛以弟洵冒入仕籍削爵
為民土御百福殿放進士梁援等百一十五人 六年五月戊
子朔監脩國史耶律白請編次御製詩賦仍命為序六月壬戌
遣使錄囚丙寅置中京國子監命以時祭先聖先師 七年三
月辛亥殺東京留守陳王蕭阿剌六月甲子以蕭謨魯為順義
軍節度使丁卯幸弘義永興崇德三宮致祭射柳賜宴賞賚有
差戊辰行再生禮復命羣臣分册射柳十一月壬午以知黃龍
府耶律阿里只為南院大王 八年五月吾獨婉暢隱屯禿葛
等乞歲貢馬駝許之六月御清涼殿放進士王鼎等九十三人

辛丑以右裔畢奚馬六為奚六部大王七月甲子射熊于外室
刺十二月癸未幸西京九年三月辛未宋使來告仁宗皇帝
崩英宗嗣位五月丙午封皇子濬梁王七月丙辰如太子山戊
午重元謀反庚申自殺辛酉詔諭諸道壬戌賞功戊辰以黑白
羊祭天八月庚午朔遣使安撫南京吏民十月戊辰朔幸興王
寺庚午以大院部太保耶律合术知南院大王事十一月辛丑
以南院宣徽使蕭九哥為北府宰相十年正月己亥北幸二
月禁南京民決水種粳稻七月壬申詔決諸路囚辛巳禁僧尼
私詣行在妄述禍福取財物九月壬寅幸懷州謁太宗穆宗廟
十月壬辰朔駐蹕中京戊午禁民私刊印文字十一月甲子定
吏民衣服之制辛未禁六齋日屠殺丁丑詔求乾文閣所闕經
籍命儒臣校讐庚辰詔南京不得私造御用綵段私貨鐵及非
時飲酒每歲春秋三司以官錢饗將士是歲南京西京大熟

咸雍元年正月辛酉朔百僚加上尊號曰聖文神武全功大略
廣智聰仁睿孝天祐皇帝改元大赦開梁王濬為太子內外官
賜級有差八月丙申客星犯天廟詔諸路備盜賊嚴火禁九月
丁丑左夸离畢慥古為孟父敝隱十月丁亥朔幸鑿巫閭山十
一月壬戌有星如斗逆行隱隱有聲十二月壬子熒惑與月竝
行自旦至午二年三月辛巳以東北路詳穩耶律韓福奴為
北院大王壬午彗星見于西方五月辛巳以戶部使劉詵為樞
密副使同知耶律白為惕隱庚申錄囚丁卯歲旱遣使振山後
貧民九月壬子朔日食以叅知政事韓孚為樞密副使十二月
壬午以劉詵叅知政事戊子加僧守志守司徒丁酉以西京留
守合术為南院大王辛丑以蕭术者為武定軍節度使御永安

殿放進士張臻等百一人三年正月甲子御安流殿釣魚三月癸亥宋使來告英宗皇帝崩神宗嗣位遣右護衛太保蕭撻不也翰林學士陳覺等弔祭六月戊申有司奏新城縣民楊從謀及僞署官吏上曰小人無知此兒戲爾獨流其首惡餘釋之庚戌宋遣使致遺物辛亥宋陳襄來報卽位遣知黃龍府事蕭圖古辭中書舍人馬鉉往賀壬戌南府宰相韓王蕭唐古致仕壬申以廣德使耶律藥奴爲南府宰相七月辛丑災感晝見凡三十五日十一月壬辰夏國遣使進回鶻僧金佛并梵覺經十二月丁未東北路詳穩高八爲南院大王丁巳行再生禮赦死罪以下是歲南京旱蝗四年正月甲戌朔日食辛巳改易州兵馬使爲安撫使二月甲辰朔詔元帥府募軍壬子夏國李秉常告其父諒祚薨遣使弔祭癸丑頒行御製華嚴經贊三

月乙酉詔南京除軍布地餘得種稻乙未秉常遣使獻遺物六月壬子西北路雨殺方三十里七月壬申置烏古敵烈部都統軍司十月辛亥南京霖雨地震曲赦徒罪以下囚永清武清安次固安新城歸義容城諸縣水復一歲租戊辰冊李秉常爲夏國王是歲振西京并應劓饑民五年三月阻卜叛以耶律仁先爲西北路招討使討之七月戊辰夏國遣使來謝封冊九月戊辰仁先遣人奏阻卜捷十一月丁丑五國割阿里部叛命蕭素颯討之閏月己未加僧志福守司徒十二月甲子行皇太子再生禮減諸路徒以下罪一等乙丑詔百官廷議國政甲戌五國來降仍獻方物六年四月癸未仁先以所降阻卜部長至行在五月甲寅詔設賢良科應舉者先以所業十萬言進六月乙酉御永安殿放進士趙延睦等百三十八人以惕隱耶律

白爲中京留守七月辛亥獵于合魯聶特八月丙子耶律白薨
追封遼西郡王九月甲寅廷臣薦馬希白詩才敏妙十吏書不
能給名試之十月丁卯五國部長來朝十二月戊午加圓釋法
鈞二僧並守司空 七年三月巳酉論討五國功加知黃龍府
蒲延懷化軍節度使高元紀易州觀察使高正平牛衛上將軍
五國節度使蕭陶蘇幹寧江州防禦使大榮並靜江軍節度使
六月癸未南院大王高八致仕七月甲申朔以東北路詳穩合
里只爲南院大王西南面招討使拾得奴爲奚六部大王巳丑
遣使按問五京囚八月辛巳置佛骨于招先浮圖十月巳卯如
鑿巫閭山壬戌以耶律藥奴爲南京統軍使戊辰謁乾陵庚辰
詔百官廷議軍國事十一月戊子免南京流民租巳丑振饒州
饑十二月壬子以契丹行宮都部署耶律胡觀知北院樞密使
事丁巳北院宣徽使劉霖都承旨楊興功各賜國姓是歲春州
斗粟六錢 八年正月癸未烏古敵烈部詳穩耶律巢奏克北
邊捷上以戰多殺人飯僧南京中京壬寅昏霧連日二月戊辰
武安并祖州僉免租稅賑中京中興府及恩蘇順惠饒義易等
州四月丁巳駐蹕塔里捨七月巳卯慶州斬文高八世同居詔
賜爵丁未以御書華嚴經五頌出示羣臣閏月辛未射熊于殺
羊山十一月丙辰大雪許民樵採禁地丁卯賜延昌宮貧戶錢
十二月戊辰以樞密副使柴德滋叅知政事庚寅賜高麗佛經
一藏 九年四月壬辰如旺國崖七月甲辰獵大熊山戊申烏
古敵烈統軍言八石烈敵烈人殺其節度使以叛詔隗烏古部
軍分道擊之丙寅南京奏歸義漆水兩縣蝗飛入宋境餘爲蜂
所食十月幸陰山遂如南京十一月戊午詔行幸之地免租一

年甲子南院大王合理只致仕 十年二月癸未詔蠲平州復業民租賦三月甲子以耶律巢爲北院大王四月旱辛未奚人達魯三世同居賜官旌之五月丙寅錄囚六月戊辰親出題試進士壬申詔臣庶言得失丙子御永安殿策賢良七月癸亥謁慶陵九月庚戌幸東京謁二儀五鸞殿癸亥祠木葉山十月丁丑詔省司頒行史記漢書十二月辛巳改明年元大赦

弘簡錄卷二百五

終

弘簡錄卷二百六

明刑部員外郎仁和弘齋邵經邦學

皇清翰林院侍講學士四世孫遠平校閱

載記 遼主八之下

道宗太康元年正月壬寅振雲州饑二月丁卯祥州火遣使恤災四月乙酉如犢山閏月丙午振平灤二州饑六月癸巳興聖宮使奚謝家奴知奚六部大王事戊戌知三司使事韓操以錢穀增羨授三司使癸卯遣使按問諸路囚以叅政柴德滋爲武定軍節度使九月己卯南京饑免租稅一年仍出錢粟振之十月西北路部長遐拾雛搭雙古等來降十一月辛酉皇后被誣賜死十二月己丑以耶律藻奴爲惕隱漢人行宮都部署耶律霖爲北院樞密副使東京留守同知蕭鐸刺右奄葛甲西京留守

守蕭燕六左夸离畢二年二月戊子振黃龍府饑三月辛酉
皇太后崩遣使報哀於宋并高麗夏國及致遺物丁卯大赦六
月乙酉朔上太行皇太后謚戊子宋及高麗夏國各遣使弔祭
甲午葬慶陵丁未册皇后蕭氏戊申劉詵復叅政事八月庚寅
獵秋山遇麋失其母憫之不射九月戊午南京蝗免明年租稅
十一月南京地震甲戌上欲觀起居注修注郎不獵及忽突董
等不進各杖罷之三年正月乙卯省諸道春貢金帛及停輸
尚方銀二月辛卯中京饑罷巡幸四月乙酉泛舟黑龍江五月
丙辰玉田安次蟻傷稼癸亥日中有黑子己巳駢蹕犢山乙亥
乙辛誣奏皇太子以無狀不治出其北院樞密使蕭速撒等
三人於外杖護衛撒撥等六人徙於邊戊寅詔告謀逆事者重
加官賞六月己卯朔乙辛復誣皇太子詔鞫問囚之宮中辛巳
殺宿直官敵里刺等三人壬午殺蕭撻不也等二人癸未復殺
耶律撒刺等十人又遣使殺上京畱守速撒及己徙護衛撒撥
等六人並籍其家乙酉殺耶律撻不也及其弟陳畱丙戌廢皇
太子爲庶人囚之上京殺東京畱守同知耶律回里不戊申遣
使按五京諸道獄七月辛亥加誣告護衛太保耶律查刺鎮國
大將軍世預突呂不部節度使之選室韋查刺及蕭寶神奴謀
魯古並加左衛大將軍十一月乙辛殺皇太子閏十二月丙寅
預行賀正旦禮是歲南京大熟四年正月甲午振東京饑二
月乙丑駢蹕掃獲野戍辰以東路統軍使耶律王九爲惕隱八
月癸卯詔有司決滯獄十一月丁亥禁士庶服用錦綺日月山
龍之文辛卯錦州民張寶四世同居命爲三班祇候五年三
月壬辰加乙辛于越出之以耶律霖爲北院樞密使副使耶律

特里底知北院樞密使事左夷離畢耶律世遷同知北院樞密
使事五月丁亥謁慶陵以林牙耶律永寧爲夸离畢六月己未
遣使錄囚放進士劉璣等百一十三人八月庚申撰太宗神功
碑立於南京九月壬午禁扈從擾民十月壬子詔惟皇子仍一
守王餘並削降丁巳振平州貧民十一月丁丑召沙門守道開
壇于內殿癸未復南京流民差役三年十二月丙午慧星犯尾
乙卯幸西京戊午行再生禮赦雜犯死罪以下六年三月庚
寅以忠順軍節度使耶律頗德爲南院大王戶部使陳毅參知
政事五月壬申免平州復業民租賦一年庚寅旱禱雨六月戊
申以度支使王績叅知政事七月戊辰觀市十月己未朔省廣
德軍節度同知命奉先軍節度使兼巡警乾顯二州庚午劉詵
致事癸酉以陳毅爲漢人行宮都部署王績同知樞密院事十
一月己丑朔日食癸卯臣議政十二月甲子以耶律特里
底爲孟父敞穩乙丑以南院樞密同知蕭撻不也爲北府宰相
耶律世遷知北院樞密使事耶律慎思同知北院樞密事庚午
免西京流民租賦一年丁亥豫行賀正旦禮七年正月戊申
五國部長來貢五月癸丑有司奏永清武清固安三縣蝗甲寅
以蕭撻不也兼殿前都點檢知契丹行宮都部署事六月甲子
詔月祭觀德殿每歲寒食并諸帝在時生辰及忌日并詣御容
殿致奠丁卯以翰林學士王言敷叅知政事七月丙申謁慶陵
八月丁卯射鹿赤山加闕場使涅葛靜江軍節度使九月戊子
次懷州辛卯次祖州命皇后謁懷祖二陵十月戊辰惕隱王九
轉南院大王夸离畢奚抄只爲彰國軍節度使十一月乙酉詔
歲出官錢振諸宮分及邊戍貧戶丁亥幸駙馬蕭酬幹第方飲

宰相梁穎諫卽還宮八年正月丁酉鐵驪五國諸長各貢方物二月己巳夏國獲宋將張天一遣使來獻壬申以耶律頗德爲南府宰相兼知北院樞密事三月詔行程忝所定升斗庚戌黃龍府女直部長木乃率部民內附詔予以官并賜甲綬四月壬戌以耶律世遷爲上京留守六月丁巳以頗德爲北院樞密使耶律巢哥南府宰相劉筠南院樞密使蕭撻不也兼知北院樞密使事王績漢人行宮都部署丙子以耶律慎思知古夸菴畢事七月南京霖雨沙河溢永清歸義新城安次武清香河六縣傷稼九月庚寅謁慶陵丁未駐蹕藕絲淀大風雪牛馬多死賜扈從官以下衣馬有差十一月壬午以乙室大王蕭何葛爲南院宣徽使權知奚六部大王事圖尅爲本部大王十二月癸丑烏古敵烈統軍使耶律馬五爲北院大王九年正月辛巳如春水四月丙午朔大雪平地丈餘馬死者十六七六月甲子轉慎思北院樞密副使庚午詔諸路檢括戶罪至死者原之閏月丁丑以可汗奴爲南院大王知興中府事邢熙年代爲漢人行宮都部署王績爲南院樞密副使七月乙巳獵馬尾山丁巳謁慶陵八月高麗王徽薨九月癸卯朔日食己酉射熊于白石山加圍場使涅葛左金吾衛大將軍壬申召北南樞密院官議政事十月丁丑謁觀德殿己卯劉筠薨壬辰耶律乙辛伏誅十一月丙午轉蕭何葛南府宰相三司使王經叅知政事兼知樞密事甲寅詔僧善知讐校高麗所進佛經頒行之己未定諸令史譯史遷敘等級十二月丁亥以邢熙年知南院樞密使事辛卯王言敷爲漢人行宮都部署是年放進士李君裕等五十一人十年二月庚午朔遠萌古國遣使來聘十二月乙未改慶

州大安軍曰興平詔改明年元赦雜犯死罪以下

大安元年正月癸卯王績知南院樞密使事邢熙年爲中京留守戊申以樞密直學士杜公謂叅知政事四月乙酉宋使來告神宗皇帝崩哲宗嗣位遣使弔祭并賀卽位六月壬申以王績爲南府宰相戊寅宋遣王真甄祐等致遺物十月戊辰夏秉常報國母梁氏哀遣使弔祭甲申以蕭撻不也爲南院樞密使十一月丁酉以南女直詳穩蕭袍里爲北府宰相辛亥史臣進太祖以下七帝實錄丙辰遣使冊三韓國公王勳子運爲高麗國王十二月甲戌宋遣使來謝二年正月癸丑召權翰林學士趙孝巖知制誥王師儒等講五經大義二月太白犯歲星四月癸丑加統軍使蕭訛都幹太子太保裨將老古金吾衛大將軍蕭雅哥靜江軍節度使耶律燕奴右監門衛大將軍仍賜資諸

士五月丁巳朔放進士張穀等二十六人丁丑以牧馬蕃息

多至百萬賞羣牧官以次進階戊寅宰相梁穎出知興中府事六月丁亥朔以左有离畢耶律坦爲惕隱癸卯遣使按諸路獄壬子高墩以下縣令錄事兄弟及子悉許叙用八月戊子以雪罷獵九月丙子謁二儀五鸞二殿辛巳召南府宰相議國政十月丁亥夏國王李秉常薨詔其子乾順知國事十二月己亥李乾順遣使上遺物是歲賜興聖積慶二宮貧民錢出粟振上京中京及遼乾顯成懿五州貧民三年正月詔出戶部粟振諸路流民及義州之饑又出雜帛賜中京并隈烏古部己卯大雪二月以民多流散除安泊逃戶徵償法三月免錦州上京貧民租一年及諸路貢輸之半四月甲辰南府宰相王績薨五月庚申海雲寺進濟民錢千萬七月庚午大雨罷獵壬辰罷節度使

已下官進珍玩十一月甲寅以耶律坦同知南京留守事耶律
王九爲南府宰相十二月己卯朔以樞密直學士呂嗣立叅知
政事四年正月甲寅太白晝見庚午免上京逋逃及貧戶稅
賦甲戌許上京南京良人自鬻丁丑曲赦西京奉聖春泰等州
役徒終身者五歲而免三月乙丑免高麗歲貢己巳振上京及
慶祖春平錦來蘇舌復淥鐵等州貧民并免稅租乙酉減諸路
常貢服御物丁酉立入粟補官法癸卯召樞密直學士耶律儼
講尙書洪範五月丙寅禁挾私引水犯田六月丁亥以南院樞
密同知耶律聶里知右夸離畢事庚寅耶律頗德致仕七月丙
辰遣使冊李乾順爲夏國王己巳禁錢出境八月庚辰有司奏
宛平永清蝗爲飛鳥所食庚寅謁慶陵十月丁丑獵遼水之濱
癸未免百姓所貸官粟癸巳以西北路招討使蕭柯哥知乙室
大王事壬寅詔諸部長官親鞫獄訟十一月庚申興中府民張
化法以父兄犯盜當死請代皆免十二月戊寅耶律王九致仕
癸未以孟父敞穩耶律慎思爲中京留守閏十二月癸卯朔預
行賀正旦禮五年三月癸酉詔析津大定二府精選舉人諭
學者窮經明道四月甲辰以知奚六部大王事涅葛爲本部大
王壬子獵北山甲子霖雨罷獵五月丁亥駐蹕赤勒嶺己丑以
阻卜磨古斯爲諸部長己亥以左祇候郎君班詳穩耶律涅里
知北院大王事六月壬戌以王言敷爲樞密副使前樞密副使
賈士勳叅知政事兼同知樞密院事十月乙巳詔新定法令大
煩復行舊法六年四月丁酉東北路統軍司設掌法官庚子
以南院樞密同知耶律吐朶知左夸離畢事六月甲寅遣使決
五京囚是年放進士文克等七十二人七年二月壬寅詔給

渭州貧民耕牛布絹五月己未朔日食六月己亥倒塌嶺人進
古鼎有文曰萬歲永為寶用丁未端拱殿門災七月戊午朔回
鶻遣使來貢異物不納厚賜遣之八月庚寅霖雨罷獵九月己
亥日本國遣鄭元鄭心及僧應範等二十八人來貢十一月甲
子望祀木葉山八年三月己亥駐蹕撻里拾浞丁未曲赦中
京蔚州役徒四月丁丑惕隱部長胡里只來附六月乙丑夏國
為宋侵遣使乞援十月丙辰賑西北路饑辛酉阻卜磨古斯殺
金吾吐古斯以叛遣奚六部禿里耶律郭三發諸蕃部兵討之
壬申南府宰相王經薨戊寅以左丞离畢耶律涅里為彰聖軍
節度使十一月戊子以樞密副使王是敦兼知樞密院事丁酉
通州潦水害稼遣使賑之戊申北院大王合魯薨是年放進士
冠尊文等五十三人九年磨古斯來侵以知北院樞密事取
律幹特刺為都統夸离畢耶律此朶副之龍虎衛上將軍耶律
胡呂為都監往討積慶宮使蕭紉里監戰七月磨古斯詣西北
路招討使耶律撻不也偽降既而乘虛來襲撻不也死之阻卜
烏古禮皆叛八月壬子籍諸路兵癸丑以南院大王特末南京
畱守同知鄭家奴與圍場都管撒八並為西北路行軍都監給
以馬三千往援十月烏古敵烈統軍使蕭朽哥並特抹等奏討
阻卜等部捷賞之壬戌以樞密直學士趙廷睦叅知政事兼同
知南院樞密使事甲子宋遣使告其母后曹氏哀遣使弔祭己
巳詔廣積貯以備水旱十二月丙辰宋饋母后遺畱物是歲興
中府甘露降遣使禱佛飯僧十年正月戊子烏古禮等來降
達里底拔思母二部復來侵四捷軍都監特抹死之二月丙午
西南面招討司奏捷三月壬申朔日食四月壬寅惕德萌得斯

老古得等各率所部來附詔復舊地丙午烏古部節度使耶律
陳家奴奏討茶扎刺捷辛亥朽哥奏頗里八部來侵擊破之五
月戊午統軍劄出兵與敵烈部戰不利敦睦宮太師耶律愛奴
及其子死之統軍朽哥有罪除名辛酉以知國舅詳穩事蕭阿
烈同領西北路行軍事六月丙戌和烈葛等部來聘癸巳惕德
來貢是夏高麗國王運薨子昱來告遣使賻贈九月甲子敵烈
諸長來降釋其罪十月癸巳西北路統軍司獲阻卜長拍撒葛
蒲魯等來獻十一月乙巳惕德銅刮阻卜的烈等來降十二月
癸酉三河縣民孫賓及其妻皆百歲復其家甲戌以樞密副使
王師儒參知政事兼同知樞密院事乙酉改明年元減雜犯死
罪以下仍除玉田密雲流民租賦一年賜西北路貧民錢

壽隆元年正月命振奉聖州及賜左右二皮室貧民錢賜東北
路貧民絹四月丁卯幹特刺奏討耶觀刮捷五月乙未朔錄右
功將士加陳家奴尚書右僕射撒八鎮國大將軍吐魯為惕隱
南京宣徽使耶律特末為北院大王癸卯贈陣亡者官六月己
巳以知奚六部大王事回里不為本部大王權參知政事趙孝
嚴為漢人行宮都部署癸巳阻北長杏里底及圖木葛來貢七
月庚子阻卜長猛達斯等來貢癸丑頗里八部附進方物甲寅
幹特刺奏破磨古斯捷進官九月甲寅祠木葉山丙辰詔西京
砲人斡人教西北路漢人十一月甲辰夏國進貝多葉佛經是
年放進士陳衡甫等百三十人乙卯二年正月乙卯駐蹕瑟尼思
辛酉市牛給烏古敵烈限烏古部貧民二月癸亥振達麻里別
古部四月己卯振西北邊軍七月甲午阻卜來貢八月乙丑頗
里八部進馬九月丙午徙烏古敵烈部于烏納水以扼北邊之

衝十二月巳未幹特刺討梅里急破之奏捷進官乙亥夏國獻
宋俘三年二月甲辰朔南京水遣使振之丙午阻卜長猛撒
葛粘八葛長秃骨撒梅里急長忽魯八等請復舊地貢方物從
之三月高麗王昱薨四月南府宰相趙延睦出知興中府事五
月癸亥幹特刺復破阻卜六月甲申詔罷諸路馳驛貢新丙戌
詔每冬駐蹕之所宰相以下構宅毋役其民辛丑夏人來告宋
城要地乞遣使諭和庚戌以契丹行宮都部署耶律吾也爲南
院大王八月巳亥蒲盧毛朶部長率其民來歸乙巳彗星見西
方九月丁丑以武定軍節度使梁援爲漢人行宮都部署十一
月乙卯蒲盧毛朶部來貢四年正月巳巳徙阻卜等貧民于
山前辛未宋遣使來饋錦綺三月丙子黃河清四月辛丑雨罷
臘五月癸酉那也奏北邊捷六月戊寅朔夏國爲宋所攻遣使

求援丁亥以遼興軍節度使溫里爲惕隱十一月乙巳朔知右
夸离畢事藥師奴樞密直學士耶律儼使宋諷與夏和五年
正月己酉詔夏國王李乾順伐拔思毋等部五月壬戌藥師奴
等使廻奏宋罷兵六月乙未五國部長來朝戊戌阻卜來貢巳
亥以興聖宮使耶律郝家奴爲右夸离畢七月壬寅朔惕德長
秃的等來貢辛亥如大牢古山十月巳亥朔高麗王顯遣使乞
封冊以爲三韓國公丁卯宋遣郭知章曹平來聘戊辰賑遼州
饑仍免租賦一年十一月甲戌賑南北二糶乙酉夏國以宋罷
兵來謝十二月甲子轉梁援遼興軍節度使六年正月癸酉
南院大王耶律吾也薨壬午以太師致仕秃開起爲奚六部大
王辛卯幹特刺執磨古斯來獻命磔于市丙申詔問民疾苦癸
丑出絹賜五院貧民辛酉宋遣使告神宗皇帝崩弟徽宗嗣位

引傳錄
卷二
遣使弔祭并賀三月甲申弛朔州山林之禁四月丁酉朔日食
五月壬午烏古部破茶扎刺乙酉趙孝嚴薨辛卯宋遣使饋遺
物六月庚子遣使往賀以有司案牘書宋主嗣位爲登寶位上
怒詔奪宰相以下官出鄭顥知興中府事韓資讓崇義軍節度
使中丞韓若義廣順軍節度使癸丑阻卜部長來貢戊午遣使
決五京滯獄己未以梁援爲樞密副使七月壬申耶觀刮諸部
寇西北路幹特刺又擊敗之使來獻捷九月癸未望祠木葉山
十月壬寅樞密副使王師儒監修國史甲寅平州饑復其租賦
一年十一月壬寅天德軍民田世榮三世同居詔官之丙子以
安車召鑿巫闔山僧志達設壇於內殿戊子李乾順請尚公主
十二月己亥以郝家奴爲北而林牙庚申帝不豫詔燕國王延
禧擬在大將軍以下官是歲放進士康秉儉等八十七人 七

年正月壬戌朔方疾御清風殿受百官及諸國使賀是夜白氣
如練白天而降黑雲起於西北疾飛有聲北有青赤黑白氣相
雜而落癸亥如混同江甲戌崩於行宮在位四十七年壽七十
舊史贊曰道宗初卽位求直言訪治道勸農興學救菑恤患衆
然可觀及夫謗訕之令旣行告訐之賞日重羣邪並興讒巧競
進賊及骨肉皇基寢危衆正淪胥諸部反側甲兵之用無寧歲
矣一歲而餽僧三十六萬一日而祝髮三千徒勤小惠蔑計大
本尚足與論治哉

載記 遼主之九

天祚皇帝諱延禧字延寧小字阿果道宗嫡孫父太子濬母蕭
氏以太康元年閏四月庚戌生賜妃親及東宮僚屬爵賞有差
三年太子被誣事旣白帝悔六年三月庚寅封爲梁王加守太

尉兼中書令爲設旗鼓拽刺六人護衛之八年詔加化哥金吾
衛大將軍以爲傳導九年十一月丙午進封燕國王大赦命知
制誥王師儒牌印郎君耶律固傳導之大安二年六月乙巳阻
卜部長余古郝及愛的來朝詔與相結爲友八月巳卯出太祖
太宗所御鏡仗諭以創業征伐之艱十一月甲戌行再生禮曲
赦上京罪囚四年五月辛亥命寫尚書五子之歌六月又命知
中丞司事五年十一月丁卯生子大赦妃之族屬爵賞有差七
年十月辛巳命總北南院樞密使事加尚書令天下兵馬大元
帥壽隆四年復以耶律幹特刺兼契丹行宮都部署以傳導之
道宗崩遺詔卽位極前羣臣上尊號曰天祚皇帝二月壬辰朔
改是年爲乾統元年大赦詔凡爲耶律乙辛誣陷者悉復官爵
出籍沒還流放有差乙未遣使告哀于宋及西夏高麗三月甲
戌召僧法顯放戒于內庭四月旱六月庚寅朔如慶州甲午宋
遣王潛等來弔祭丙申高麗夏國各遣使慰奠庚子上大行尊
謚曰仁聖大孝文皇帝廟號道宗及改謚懿德皇后爲宣懿辛
亥合葬慶陵自八月至于十月連謁慶懷乾陵甲辰上皇考昭
懷太子謚曰大孝順聖皇帝廟號順宗皇妣曰貞順皇后十二
月戊子以翰林學士張奉珪叅知政事兼同知樞密院事癸巳
宋遣黃實來賀卽位丁酉高麗夏國並遣使來賀是歲生女直
部阿骨打襲節度使 二年三月大寒冰復合四月辛亥發乙
辛得里特之墓剖棺戮屍以其家屬分賜被殺之家諸黨與子
孫徙之于邊六月壬辰以雨罷獵壬子李乾順爲宋所攻遣使
求援閏月庚申策賢良壬申降惠妃爲庶人七月獵黑嶺以霖
雨給獵人馬十月乙卯蕭海里叛劫乾州武庫器甲命北面林

牙郝家奴捕之以亡入女直不獲免官丙寅以上京萬守耶律慎思爲北院樞密副使十一月壬寅有司請以帝生日爲天興節三年正月辛巳朔女直函蕭海里首來獻二月庚午武清縣大水弛其陂澤之禁五月戊子獵人多亡嚴立科禁七月中京雨雹傷稼十月己巳有事于觀德殿十一月丙申文武百官加上尊號曰惠文智武聖孝皇帝大赦百官各進一階乙巳謁太祖廟追尊太祖之高祖曰昭烈皇帝廟號蕭祖妣曰昭烈皇后曾祖曰莊敬皇帝廟號懿祖妣曰莊敬皇后召監修國史耶律儼纂太祖諸帝實錄是年放進士馬恭回等百三人四年六月甲寅夏國遣其臣李造福田若水來求援七月南京蝗庚辰獵南山癸未以耶律慎思知北院樞密使事辛卯同知南樞密蕭敵里爲西北路招討使十月己酉鳳凰見于鄯陰己未幸

南京十一月乙亥御迎月樓賜貧民錢五年正月乙亥夏國乞伐宋丁酉遣樞密直學士高端禮等諷宋罷伐夏兵二月癸卯微行視民疾苦三月壬申夏國請尚主凡三以族女南仙封成安公主下嫁之四月甲申射虎炭山五月壬子宋遣曾孝廣王戡報聘七月謁慶陵乙卯謁乾陵十一月戊戌禁商賈之家應進士舉丙辰高麗三韓國公王顥薨子俱來告十二月癸酉宋遣林洙來議與夏約和六年正月辛丑遣蕭得里底牛溫舒使宋諷歸所侵夏地六月辛巳夏國遣使來謝及貢方物十月乙亥宋與夏通好遣劉正符曹穆來告十一月乙未耶律馬奴爲奚六部大王丙申行柴冊禮戊戌大赦封皇子敖盧幹晉王習泥烈饒樂郡王己亥謁太祖廟甲辰祠木葉山七年放進士李石等百人八年四月丙申封高麗王俱爲三韓國公

贈其父顯爲高麗國王六月壬辰西北路招討使蕭敵里率諸蕃來朝丙申射柳祈雨七月戊辰以雨罷獵十二月巳卯高麗遣使來謝并脩貢九年三月戊午夏國以宋不歸地遣使來書七月隕霜傷稼八月丁酉雪罷獵十月癸酉望祀木葉山丁丑詔免今年租稅是年放進士劉禎等九十人十年正月辛丑預行立春禮四月丙戌預行再生禮癸巳獵于北山六月癸未夏國遣李造福等來貢甲午阻卜來貢是秋連謁慶懷祖陵十二月巳酉改元

天慶元年大饑二年二月丁酉幸混同江釣魚生女直部長阿骨打率其弟吳乞買粘罕胡舍等皆來朝嘗從獵能呼鹿刺虎搏熊上喜輒加官爵適遇頭魚宴上命諸長次第起舞阿骨打跋扈辭以不能由是見疑七月乙丑獵南山九月巳未獲熊上歡甚燕羣臣親御琵琶是秋駐蹕奉聖州十一月乙卯幸南京丁卯謁太祖是年放進士韓昉等七十七人三年正月丙寅賜南京貧民錢甲戌禁僧尼破戒丙子獵狗牙山三月籍諸道戶徙大牢古山圍場地居民于別土阿骨打率五百騎突至咸州吏民大驚白是遇上召輒稱疾不復至矣閏四月左道李弘聚衆爲亂詔支解分示五京十一月甲午以三司使虞融知南院樞密使事西南面招討蕭樂古爲南府宰相四年正月

女直阿蘇來奔阿骨打遣人來索七月東北路統軍司奏女直阿骨打反攻寧江州上在慶州射鹿不以介意遣海州刺史高仙壽統渤海軍應援蕭撻不也與女直戰于寧江東敗績十月壬寅以守司空蕭嗣先爲東北路都統靜江軍節度使蕭撻不也副之發契丹奚軍三千中京禁兵及土豪二千別選諸路武

勇合萬餘人命虞候崔公義控鶴指揮那頴押往軍潰公義頴
及耶律佛雷蕭葛十等死之獲免者僅十七人十一月壬辰都
統蕭敵里等復營幹鄰灤東爲女直所襲死者甚衆甲午免敵
里官辛丑以西北路招討使耶律幹里朶爲行軍都統副點檢
蕭乙薛同樞耶律章奴副之十二月咸賓祥三州及鐵驪兀惹
皆叛入女直乙薛往援賓州南軍諸將實婁特烈等往援咸州
並爲女直所敗五年正月遣僧家奴持書約和阿骨打遣賽
刺復書欲歸叛人遷黃龍府于別地然後議之幹里朶等與戰
于達魯古城敗績二月遣耶律張家奴等齎書斥阿骨打名冀
其速降六月壬子使還復書亦斥上名速降如之癸丑詔諭諸
道車駕親征癸亥以惕隱耶律末里爲北院大王遣蕭辭刺復
使女直以書辭不台見雷七月辛未宋遣使致助軍銀絹丙子
獵于嶺東幹里朶等又敗于白馬灣皆免官八月甲子罷獵始
趨軍中丙寅以圍場使阿不爲中軍都統張家奴爲都監率番
漢兵十萬蕭奉先充御營都統耶律章奴諸行營都部署以精
兵二萬爲先鋒餘分五部爲正軍貴族子弟千人爲硬軍扈從
百司爲護衛軍北出駱駝口復以都點檢蕭胡覲姑爲都統樞
密直學士柴誼副之將漢步騎三萬南出寧江州自長春州分
道而進發數月糧期必滅女直九月丁卯朔女直陷黃龍府已
巳辭刺還女直復遣賽刺陽爲卑辭實欲求戰書進上大怒下
詔有女直作過大軍翦除之語十一月命駙馬蕭特末林牙蕭
察刺等將騎兵五萬步卒四十萬至幹鄰灤上自將親軍七十
萬至駝門十二月戊申戰于護步答岡敗績盡亡其輜重是歲
耶律章奴謀立魏國王淳饒州渤海古欲自稱大王以蕭謝佛

留等討之而敗復命南面副部署蕭陶蘇幹招獲之耶律張家奴又叛以北面林牙耶律馬哥致討六年正月東京留守蕭保先爲政嚴酷渤海人患苦攻殺之其裨將高永昌僭號稱隆基元年遣蕭乙薛高興招之不從閏月己亥遣蕭韓家奴張琳往討戊午貴德州守將耶律余覲以廣州渤海叛附永昌我師擊敗之二月戊辰侍御司徒撻不也等與張家奴戰于祖州敗績乙酉復遣蕭特末率諸將往討戊子張家奴誘饒州渤海及中京賊侯槃等萬餘人攻陷高州三月東面行軍副統酬幹等擒侯槃于川州四月戊辰親征張家奴敗之饒州渤海平丙子賞功奪張琳官琳因奏前日之敗失於輕舉若用漢兵二十萬分道而進計無不克上許其半詔中京上京長春遼西四路計戶產出軍有雜畜十頭以上皆籍之至有起至二百軍者生業蕩散民甚苦之四路軍甫集尋復遁去五月女直攻瀋州東京陷擒高永昌族人痕孛鐸刺吳十撻不也道刺酬幹等十三人皆降女直七月春州渤海二千餘戶叛東北路統軍使勒兵追及盡俘以還八月烏古部叛遣中丞耶律撻不也等招降之十一月東面行軍副統馬哥等攻岳蘇館敗績削官七年正月女直軍攻春州復下泰州東北面諸軍不戰自潰女古皮室四部及渤海人皆降二月溱水縣賊董龐兒聚衆萬餘西京留守蕭乙薛南京統軍查刺與戰于易水破之三月龐兒黨復聚乙薛擊破之于奉聖州五月庚寅東北面行軍諸將涅里合魯涅哥虛古等于禁地射鹿棄市八月命都元帥赴沿邊會四路兵馬防秋九月上自燕至陰涼河置怨軍八營募自宜州者曰前宜後宜自錦者曰前錦後錦自乾自顯者曰乾曰顯又有乾顯

大營巖州營凡二萬八千餘人屯衛州蒺藜山十二月丙寅都
元帥遇女直軍戰于蒺藜山敗績女直進拔顯州旁近州郡庚
午下詔自責癸酉遣夸离畢查刺與太公鼎諸路募兵是歲女
直鐵州楊朴說阿骨打自古英雄開國受禪必先求大國冊封
遂遣使來求封 八年正月山前諸路大饑初削榆皮餓而人
相食丁亥遣耶律奴哥等使金議和時東路諸州盜起游民充
食安生兒張高兒聚眾二十萬霍六哥陷海北州耶律馬哥等
斬生兒子龍化州高兒亡入懿州與六哥合趣義州回離保等
擊敗之二月奴哥還金主復書稱朕要以兄事歲貢方物仍歸
上京中京興中三路州縣以親王公主駙馬大臣子孫為質及
還行人并元給信符宋夏高麗往復書詔表牒方可約和三月
甲午復遣奴哥使金要以酌中之議五月戊戌金主遣胡突哀

與奴哥持書報如前約六月丁卯遣奴哥等齎宋夏高麗書詔
表牒至金七月獵秋山金復遣胡突哀來免取質子及上京興
中府所屬州郡裁減歲幣之數固欲事以兄禮冊用漢儀八月
庚午遣奴哥突迭使金議冊禮九月金陷突迭遣奴哥還如言
不從勿復遣使十二月甲申議定冊禮遣奴哥使金是年放進
士王翬等百三人 九年正月金遣烏林荅贊謨持書來迎冊
三月丁未朔遣知右夸离畢事蕭習泥烈等冊金主為東懷國
皇帝七月金責冊文無兄事之語不言大金而云東懷乃小邦
懷其德之義及其中有桀材二字語涉輕侮若遙芬多戩等語
又非善意殊乖體式如依前書所定然後可從九月復遣習泥
烈與楊立忠持冊葉使金烏林荅等亦還是歲賊張撒八誘中
京射糧軍僭稱南面軍帥余覩擒之阻卜補疎只等叛執招討

使耶律幹里朶都監蕭斜里得死之耶律陳圖奴等二十餘人謀反伏誅十年二月金復遣烏林荅贊謨持書及冊文副本以來仍責乞兵于高麗三月庚申以金人所定大聖二字與先世稱號同復遣習泥烈往議金主怒遂絕之四月獵狐土白山間金師再舉耶律白斯不等選精兵三千以濟師五月金攻上京克外郭畱守撻不也率衆出降六月乙酉以北府宰相蕭乙薛爲上京畱守知鹽鐵內省兩司東北統軍司事

保大元年正月丁酉朔改元肆赦時郡縣所失幾半上有四子長趙王母趙昭容次晉王母文妃次秦王許王皆元妃生國人知晉王賢深所屬望元妃兄樞密使蕭奉先恐秦王不得立潛圖之文妃姊妹三人長適耶律撻葛里次卽妃次適余覲一日其姊妹俱會軍前奉先諷人誣駙馬蕭昱及余覲等謀立晉王

昱等撻葛里等伏誅文妃賜死獨晉王未忍加罪余覲在軍中聞之大懼卽率千餘騎叛入金上遣知奚王府事蕭選買北府宰相蕭德恭大常衮耶律諦里姑歸州觀察使蕭和尚奴四軍并太師蕭幹將所部兵追之始言追襲不及反授以官十一月癸亥以西京畱守趙王習泥烈爲惕隱二年正月乙亥余克中京下澤州帝出居庸關至鴛鴦灤余覲引婁室孛堇奄至蕭奉先曰余覲此來欲立甥晉王耳何惜一子明其罪誅之余覲可不戰退矣帝遂賜晉王死王素有人望諸軍聞其死無不流涕由是人心解體余覲引金人通行宮帝率衛士五千餘騎幸雲中遺傳國璽于桑乾河二月甲午以北院大王耶律馬哥漢人行宮都部署特末並爲都統太和宮使耶律補得副之將兵屯鴛鴦灤己亥金師敗奚王霞末于北安州降其城三月辛

西帝聞金師將出嶺西遂趨白水灤乙丑群牧使漢魯幹隆金
丙寅帝至女古底倉金兵將近計不知所出乘輕騎入夾山方
悟奉先之不忠怒曰汝父子誤我至此始誅奉先遂蕭得里底
召撻不也典禁衛丁卯以副使蕭僧孝奴知北院樞密使事同
知院事蕭查刺爲左丞商甲戌辰殿前點檢同知耶律高八率
衛士降金已巳金軍獲偵人蕭和尚牌印郎君耶律咽斯癸酉
詣局百工多亡詔凡扈從不限吏民皆官之四月辛卯西南面
招討使耶律佛頂及雲內寧邊東勝等州皆降阿疎仍被金擒
金已取西京沙漠以南部族皆應帝遂遁於訛莎烈北部謨葛
失驢馬馳食羊五月甲戌都統馬哥收集散亡會于漚里謹拜
知北院樞密使事謨葛失復以兵來援金人敗之于洪灰水擒
其子陀古及其屬阿敵音夏國援兵至亦爲所敗七月乙丑上

京毛八十率二千戶降金辛未夏國遣曹价來問起居八月戊
戌親遇金軍戰于石輦驛敗績都統蕭特末及其姪撒古被執
辛丑會軍于歡撻新查刺金兵追之急棄輜重以遁九月敵烈
部叛都統馬哥克之十月金兵降蔚州十一月乙丑聞金兵至
奉聖州遂率衛兵遁于落昆髓金兵臨居庸關崖石自崩戌卒
多壓死十二月金撫定南京上由埽里關出居四部族詳穩之
家三年正月丁巳奚王回離保僭號稱天復元年命都統馬
哥討之庚辰宜錦乾顯成川豪懿等州相繼皆降二月乙酉朔
興中府及來州并歸德軍節度使田顥權隰州刺史杜師回權
遷州刺史高永昌權閩州刺史張成皆籍所管戶降金癸巳興
中宜州復城守三月駐蹕于雲內州南四月甲申朔以蕭僧孝
奴爲諸道大都督戊戌金圍輜重于青冢硬塞秦許二王及諸

妃公主從臣皆陷沒壬寅金遣人以書來招癸卯荅言請和丙午金兵送族屬輜重東行遣兵邀戰于白水樂趙王習泥烈蕭道寧皆被執帝遣牌印郎君謀盧瓦送兔紐金印偽降遂西遁雲內駙馬乳奴詣金降巴酉金帥復以書來不許請和五月己卯夏國遣使請臨其國辛酉渡河止于金肅軍六月遣使冊李乾順爲夏國皇帝十月復渡河東還居突呂不部四年正月帝趨都統馬哥軍金人來攻秦營北遁馬哥被執謨葛失來迎驢馬駝羊率其部人防衛封爲于越王二月耶律遙設等十人謀叛伏誅先是大石林牙已爲金所執數月復歸帝白謂天助又得陰山室常謨葛失兵謀復收燕雲率諸軍出夾山下漁陽嶺取天德東勝寧邊雲內等州南下武州遇金人戰于奄遏下水復潰直趨山陰八月國舅詳穩蕭撻不也筆倪祇侯察刺降

金是月金主阿骨打死九月建州降金十月招吉牙亦率衆降金攻典中府咸無拒意十一月從行者舉兵亂北護衛太保木者舍利詳穩牙不里等擊敗之十二月置二總管府五年正月辛巳党項小斛祿遣人請臨其地戊子趨天德過沙漠金兵忽至帝徒步乘張仁貴馬得脫近侍進珠帽却之己丑遇雪無禦寒具途次絕糧木者進貂帽及麩與棗衆惟自齧冰雪欲憩卽跪坐木者之股復倚之假寐過天德己夜將宿民家給曰偵騎其家知之乃叩馬首跪而大慟潛宿其家居數日嘉其忠遙授以節度使遂趨党項以小斛祿爲西南而招討使總知軍事仍賜其子及諸校爵賞有差二月至應州新城東六十里爲金將完顏婁室等所獲八月癸卯至金丙午降封海濱王以疾終年五十四在位二十四年金皇統元年二月改封豫王五年葬

弘簡錄 卷二百之六
于廣寧府閭陽縣乾陵旁

弘簡錄卷二百六 終

弘簡錄卷二百七

明刑部員外郎仁和弘齋邵經邦學

皇清翰林院侍講學士四世孫遠平校閱

載記 遼后妃

太祖后

太宗后

世宗后

如甄氏

穆宗后

景宗后

聖宗后

仁德欽哀

興宗后

貴妃

道宗后

惠妃

天祚后

德妃元妃

文妃

遼因突厥舊俗稱皇后曰可敦國語謂之忒俚蹇尊稱曰耨幹

麼母稱幹后土稱

亦作改耨蓋以配后土而稱為母太祖卽位始從

唐制尊祖母曰太皇太后母曰皇太后嬪曰皇后本無姓氏以

嘗慕漢高帝故耶律儼舊史稱劉氏其后族乙室拔里世任國

事以比蕭相國故后皆為蕭氏云 太祖后述律氏諱平其先

上簡錄

卷二百之七

遼后妃一

回鶻人糯思生魏寧舍利魏寧生慎思梅里慎思生婆姑梅里
婆姑名月梳仕遙輦氏爲阿扎割只娶勻德憇王女生后于契
丹右大部自幼簡重多智而忍後歸太祖果斷有雄畧諺語地
祇爲青牛嫗有童謠曰青牛嫗曾避路及迎后至遼土二河之
會忽有女子乘青牛車倉卒不見自此興兵動衆嘗與后謀遇
太祖乘虛渡磧襲擊党項黃頭臭泊二室韋后勒兵以待畚擊
大破之名震諸獯卽位並上尊號曰地皇后又加號應天大明
晉王李存勗欲結爲援事以叔母幽州劉守光遣韓延徽來聘
太祖怒其不拜留使牧馬諫曰守節不屈此必賢者宜禮用之
得召見與語大悅以爲謀主將選三萬騎攻幽州勸曰豈有試
讐而攻人國者指帳前樹曰無皮可以生乎太祖曰不可后曰
幽之有土有民亦猶是耳吾以三千騎掠其四野不過數年因
而歸我矣何必爲此萬一不勝爲他國笑吾部落不將解體乎
其謀畧多此類後平渤海亦預有謀太祖崩悉召從行將帥等
妻謂曰我今爲寡婦女等豈宜有夫因殺大將百餘曰可往從
先帝于地下左右有過者亦多殺於幕隧中大將趙忠溫以材
勇爲太祖所寵後因事怒之使送木葉山不肯行后曰爾先帝
親信安得不往見之思溫對曰親莫如后何乃不行后曰我本
欲從以子幼國中多故尚未能也今可斷吾一臂以送之左右
切諫乃斷其一腕納于壙中而釋思溫不殺凡生三子太祖嘗
謂太宗必興我家后欲令太子倍避之乃冊爲東丹王又常屬
意少子李胡太宗卽位尊爲皇太后建生日爲永寧節十月癸
卯永寧節帝率羣臣上壽延和宮天顯五年正月甲午朝皇太
后十年二月丙戌皇太后父族及母前夫之族二帳並爲國舅

以蕭緬思爲尚父領之十一年七月上以李從珂弒君自立神人共怒白太后宜行天討十二月戊子以滅唐立晉遣使馳奏太后十二年正月丙戌駕還遣侍衛實魯趣行戊寅朝于皇太后十月庚辰朔永寧節晉及回鶻燉煌諸國皆遣使來賀會同元年九月庚戌晉遣司空馮道散騎常侍韋勳來上尊號曰廣德至仁昭烈崇簡應天皇太后御開皇殿受冊三年七月癸酉朝于皇太后五年七月丁丑遣豫上馳入侍湯藥仍告太祖廟幸菩薩堂飯僧七日乃愈及滅晉勸帝欲用一漢人爲主太宗不可怒曰汝得中原不能有後必有禍悔無及矣旣而太宗果崩于路后不哭撫其尸曰待我國中人畜如故然後葬汝及世宗卽位遷后于祖州應曆三年崩年七十五祔葬祖陵諡貞烈重熙改諡淳欽

太宗后蕭氏小字溫淳欽皇后弟室魯之女帝爲大元帥納爲妃生穆宗及卽位立爲皇后性聰慧潔素尤被寵顧雖軍旅田獵必與天顯九年十二月壬辰皇子阿鉢撒葛里生不豫明年正月戊申崩于行在五月甲午朔始製服行喪丙午葬于泰陵上自製文諡曰彰德十年十一月丙午幸弘福寺爲皇后飯僧重熙同改諡靖安

世宗后蕭氏小字撒葛只淳欽皇后弟阿古只之女帝爲永康王納之生景宗天祿末立爲皇后明年秋生萌古公主在尋察割作亂后乘步輦直詣弒所請畢收殮明日遇害諡曰孝烈重熙同改諡懷節 妃甄氏後唐宮人有姿色帝從太宗南征得之寵遇甚厚生寧王只沒及卽位立爲皇后嚴明端重風神閑雅內治有法莫敢干以私劉知遠郭威稱帝世宗承強盛之資

奄奄歲時后與祭帷幄密贊大謀不果後亦死察割之難景宗立葬二后于鑿巫閭山建廟陵寢之側

穆宗后蕭氏內供奉翰林承旨知璠之女生有雲氣馥郁久之幼有儀則帝居藩納爲妃及正位中宮性柔婉不能規正無子景宗后蕭氏諱綽小字燕燕父思溫有傳后早聰慧思溫愛之過於諸女卽位選爲貴妃尋冊爲皇后生聖宗卽位尊爲皇太后后攝國政泣語宰臣母寡子弱族屬雄強邊防未靖奈何耶律斜軫韓德讓進曰信任臣等何慮之有后於是悉意與大臣參決大政統和元年二月丙申詣陵置奠命繪近臣於御容殿尋改爲玉殿酒谷爲聖谷五月乙亥詔近臣議上尊號樞密使韓德度以後漢太后臨朝故事草定之七月甲寅朔臨朝聽政八月辛卯親祭父楚國王墓十二月己亥觀漁于玉盆灣辛丑觀

于濬洲雙溪然萬魚燈二年二月朝皇太后因請觀獵於饒樂川四月庚寅皇太后臨決滯獄六月己卯朔又決獄至月終七月癸丑行再生禮三年六月甲戌親決滯獄八月癸未帝奉皇太后謁乾顯二陵四年正月丁卯朝皇太后決滯訟三月辛巳宋兵入涿州上與皇太后駐兵馳羅口詔越東征兵馬以爲應援委于越休哥以南邊事四月癸未休哥提聞上祭天地率羣臣賀于皇太后庚申上朝皇太后五月壬申皇太后生辰從還九月甲午皇太后行再生禮爲帝祭神祈福十一月祭日月爲駙馬勤德祈福五年四月丁酉朔百僚冊上皇太后尊號曰睿德神畧應運啟化承天皇太后六年八月丁酉幸韓德讓帳厚加賞賚七年四月己未幸延壽寺飯僧丁卯謁竒首可汗廟十年九月癸卯幸五臺山金河寺飯僧十二年四月戊戌景宗并

太后石像成幸延壽寺飯僧九月丁卯奉安石像于延芳旋及
乾州十五年二月丙午夏國遣使來貢并問安皇太后八月丁
酉戒帝獵于平地松林十九年四月丙午帝問安皇太后二十
一年三月甲午朝皇太后七月丙戌朝皇太后二十二年四月
丁卯朝皇太后十二月戊子宋遣李繼昌請和尊太后為叔母
二十三年二月辛酉朝皇太后五月戊申朔宋遣孫僅等來賀
生辰七月癸丑問安皇太后十月戊子朝皇太后十一月戊申
太后遣太師益奴政事舍人高正使宋賀正旦二十七年十二
月乙酉不豫戊子肆赦辛卯崩于南京行宮明年正月癸酉奉
安梓宮于乾州菽塗殿謚曰聖神宣獻皇后重熙十一年興宗
與皇太后素服飯僧于延壽憫忠二寺二十一年改謚睿智后
明達治道開善必從故羣臣咸竭其忠習知軍政澶淵之役親
御戎車指麾三軍賞罰信明將士用命聖宗稱遼盛主后教訓
為多焉

聖宗后蕭氏小字菩薩哥睿智皇后弟駙馬隗因之女母公主
粘米衮年十二美而才選入掖庭事帝凡四十年統和十九年
三月皇后蕭氏以罪降為貴妃五月更冊為齊天皇后素有巧
思嘗以草達為殿式密付有司令造清風天祥八方三殿既成
益寵異之所乘車置龍首鷓尾飾以黃金又造九龍輅諸子車
以白金為浮圖夏秋從行山谷間花木如繡車服相錯人望之
以為神仙開泰三年與上同獵瑞鹿原太平三年七月丙戌立
生日為順天節宋遣薛奎郭盛來賀七年上與臨幸祇拜后父
母空帳失致敬禮今後可設像拜謁生二子皆天養宮人擣斤
所生子為已子即興宗也視如已出興宗侍后亦謹擣斤不悅

帝大漸令左右扶后出嘗以老物寵亦有既耶帝崩遂自立是
為欽哀皇后護衛馮家奴喜孫等希旨誣告北府宰相蕭浞卞
國舅蕭匹敵謀逆詔令鞠治詞連及后與宗聞之曰皇后撫育
眇躬當為太后今不果立反可罪之乎欽哀曰此人若在恐為
後患帝曰后無子而老雖在無能為也欽哀不從遷后于上京
車駕春蒐欽哀慮帝懷鞠育恩馳遣人加害后語其人曰我實
無辜天下共知待我浴而後就死人退后乃自縊年五十是日
若有見后于木葉山陰者乘青蓋衛從甚盛後追尊仁德皇后
與欽哀並祔慶陵 欽哀亦姓蕭氏小字耨斤淳欽皇后阿古
只五世孫黥而狠視母嘗夢金柱擎天諸子欲上不能耨斤後
至與僕從皆升異之久之入宮嘗拂承天太后榻獲金鷄吞之
膚色光澤勝常太后驚異曰是必有奇子已而果生興宗即位
尊為皇太后攝政追封曾祖為蘭陵郡王父為齊國王諸弟亦
皆王封以生辰為應聖節賜駙馬蕭釁不里蕭匹敵死殺其黨
彌勒奴觀音奴等圍場都太師女直著骨里右祇候郎君詳穩
蕭延畱等七人棄市咸籍其家七月丙午朔率皇族大臨于太
平殿宋遣孔道輔魏昭文賀皇太后冊禮梅詢張綸吊慰復遣
右領軍衛上將軍耶律遜少府監馬憚充謝宋使十一月乙未
問安皇太后重熙元年十一月己卯上尊號法天應運仁德章
聖皇太后宋遣陳琰王克善來賀又遣劉隨王德來賀應聖節
三年后陰召諸弟議欲立少子重元帝乃收太后符璽遷于慶
州七括宮六年秋帝悔之七年春遣使問安親馭奉迎居大安
宮侍養益謹獵金山進鹿尾茸十一月辛丑問安進珍玩十二
月甲申命日進酒八年七月迎至顯州共謁園陵十一月戊戌

朝皇太后召僧問佛法戊申行再生禮大赦九年三月辛未應
聖節大赦十年九月辛亥朔朝皇太后庚申皇太后射獲熊上
進酒爲壽十一年正月戊申奉迎皇太后于內殿十二月癸卯
朝皇太后十五年應聖節減死罪釋徒以下十六年四月不豫
丙午愈丁卯肆赦十二月癸丑問安皇太后二十年十二月乙
酉皇太后行再生禮肆赦二十一年十二月庚子應聖節曲赦
徒以下罪二十三年加上尊號仁慈聖善欽孝廣德安靜貞純
懿和寬厚崇覺儀天皇太后后常不懌帝崩殊無戚容見崇聖
皇后悲泣如禮謂曰汝年尚幼何哀痛如是清寧元年尊爲太
皇太后十二月戊子應聖節帝上壽宴羣臣命婦二年曲赦百
里內囚三年十二月戊辰不豫曲赦行在五百里內囚已巳崩
更諡欽哀皇后

興宗后蕭氏小字撻里欽哀皇后弟孝穆長女性寬容姿貌端
麗帝卽位入宮生道宗重熙四年皇后蕭氏以罪降爲貴妃三
月乙酉朔冊立爲皇后十一年冊上尊號曰貞懿宣慈崇聖皇
后二十三年再冊號貞懿慈和文惠孝敬廣愛崇聖皇后道宗
卽位尊爲皇太后清寧二年上尊號曰慈懿仁和文惠孝敬廣
愛宗天皇太后三年八月辛亥帝上詩皇太后曰君臣同志華
夸同風八年行再生禮曲赦西京罪囚九年秋敦睦宮使耶律
良以重元反狀密告太后乃言于帝曰此社稷大事宜早爲計
帝始以爲疑至是戒嚴及戰太后親督衛士破逆黨咸雍元年
七月丙子皇太后射獲熊賞資百官十月己亥又射獲虎大宴
羣臣令各賦詩六年十二月己未坤寧節赦徒罪以下八年十
二月丁丑坤寧節又大赦太康二年崩更諡仁慈皇后素性仁

慈淑謹中外感德凡正旦生辰諸國貢幣悉賜貧瘠嘗夢重元
曰臣骨在太子山北不勝寒栗寤卽命屋之其慈憫多類此
貴妃蕭氏小字三姐駙馬都尉匹里之女太平八年遷入東宮
爲太子妃卽位立爲皇后以罪降

道宗后蕭氏小字觀音父惠有傳后姿容冠絕工詩善談論自
制歌詞尤善琵琶重熙中納爲燕趙王妃清寧初立爲皇后上
尊號曰懿德皇太叔重元妻以艷冶自矜后見之戒曰爲貴家
婦何必如此及生太子濬有專房寵好音樂伶官趙惟一得侍
左右太康初宮婢單登教坊朱頂鶴誣后與惟一私樞密乙辛
以聞詔與張孝傑劾狀因而實之族誅惟一高長命並籍家資
賜后自盡歸其尸於家乾統初追諡宣懿皇后台葬慶陵 惠
妃蕭氏小字坦思父別里刺祇郎君叔余里也西北路招討

使兄霞抹駙馬都尉太康元年乙辛旣誅皇后因譽之遷入掖
庭立爲皇后封父趙王叔遼西郡王霞抹柳城郡王居數歲未
見皇嗣后妹幹特懶先嫁乙辛子綏也后以宜子言于帝離婚
納宮中八年皇孫延禧封梁王降爲惠妃徙乾陵還幹特懶于
其家大安二年其母燕國夫人削古厭魅梁王伏誅貶妃爲庶
人幽于宜州天慶六年召還十二月乙亥封爲皇太妃後二年
奔黑頂山卒葬太子山

天祚后蕭氏小字奪里懶相繼先五世孫大安三年入宮明
年封燕國王妃乾統初冊爲皇后性閑淑有儀則兄弟奉先保
先等緣后寵柄任女直亂從天祚西狩以疾崩 德妃蕭氏小
字師姑父常哥有傳壽隆二年入宮封燕國妃明年三月辛酉
生子賜名撻魯仍給官屬錢帛乾統三年改德妃以柴冊禮封

撻魯為燕國王加妃號替翼乾統四年王薨以哀戚卒 文妃
蕭氏小字瑟瑟國舅大父房之女乾統初帝幸耶律撻葛第見
而悅之匿宮中數月皇太叔和魯幹勸帝以禮還納三年冬立
為文妃生蜀國公主晉王放盧幹尤被寵幸以柴冊加號承翼
善歌詩女直亂帝畋遊不恤忠臣多被疎斥妃作歌諷諫其詞
曰勿嗟塞上兮暗紅塵勿傷多難兮畏夸人不如塞茲之路兮
選取賢臣直須卧薪嘗膽兮激壯士之損身可以朝清塞北兮
夕枕燕雲又歌曰丞相來朝兮劍佩鳴于官側日兮寂無聲養
成外患兮嗟何及禍盡忠臣兮罰不明親戚並居兮藩屏位私
門潛畜兮爪牙兵可憐往代兮泰天子猶向宮中兮望太平天
祥見而銜之播遷以來郡縣所失幾半上頗有倦勤之意元后
兄蕭奉先深忌晉王誣以妃與聞謀立之事賜死 元妃蕭氏

小字貴哥燕國妃之妹年十七訓為元妃性沉靜嘗畫鏡近侍
盜貂襦妃覺而不言宮掖稱其寬厚從天祚西狩以疾薨 舊
史贊曰遼以鞍馬為家雖后妃往往長於射御軍旅田獵未嘗
不從如應天之奮擊室韋承天之御戎澶淵仁懿之親被重元
古所未有亦其俗也靖安無毀無譽齊天巧思乃奢侈之漸宣
懿度曲知音故致誣讖文妃能歌詩諷諫而謂謀私其子寃矣
若簡憲之艱危保孤懷節之從容就義雖烈丈夫何以過之欽
哀狠桀賊殺嫡后而興宗不能以禮防閑之惜哉

載記 遼系屬

太祖弟蘇奴瓜蒲古拔里得子海魯不古子賢合住

子倍隆先李胡喜隱牙里果子蔽祿

太宗子蔽烈必攝世宗子吼阿不

景宗子隆慶

遼系屬二

聖宗子

宗簡宗愿

興宗子

和魯幹阿連

道宗子

濬

天祚子

敖廬幹

耶律大石

附

太祖異母弟蘇字雲獨昆行六為人性柔順事上忠讜言無隱情太祖尤愛之二十功臣蘇居其一滄州節度使劉守文求救命往救解其圍刺葛詐降蘇往來其間及平其力居多時因亂後名族多罹禍南府宰相之位久虛以鋤得部轄得里只里古攝府中蘇數請擇任宗室上從之在位頗以斯聞民咸怨之天贊三年九月丙午與南院夸離董迭里畧地西南乙卯獻俘天顯初從征渤海還九月壬戌薨孫奴瓜字延寧有膂力善調鷹隼統和中為黃皮室紮都監擊敗楊繼業盡復所陷城邑軍還加諸衛小將軍伐宋有功遷黃皮室詳穩六年再舉將先鋒軍敗宋游兵于定州授東京統軍使加金紫崇祿大夫從奚王和剌奴伐兀惹失利削階十九年復拜南府宰相伐宋至望都擒其將王繼忠俘殺甚眾以功加同政事門下平章事二十六年改遼興軍節度使開泰初加尚父卒四世孫蒲古字提隱以武勇稱統和初為涿州刺史從伐高麗有功開泰末為上京內客省副使太平二年城鴨綠江命守之在鎮有治績五年改廣德軍節度使尋遷東京統軍使蒞政嚴肅諸部懾服大延琳叛以書結渤海人妄行美時行美總渤海軍于保州不從其招執其人送于蒲古乃誘賊八百餘殺之蒲古入據保州斷其車路黃龍保州遂皆不附惟南北女直從之高麗亦稱其貢延琳氣沮嬰城自守數月而破以功拜蒲古惕隱加行美同政事門下平章事錫資甚厚十一年蒲古為子鐵驪所弑行美後擢忠順軍節度使重熙十七年從耶律義先討蒲奴里遷副部署獲

其長陶得里以歸卒上思其功遣使祭于家 奴瓜孫頗的字
撒版素孤介寡合重熙初補牌印郎君清寧初遷知易州去官
部民請畱許之咸雍八年改彰國軍節度使上獵大牢古山謁
于行宮帝問邊事對曰自應州南境至天池皆我耕牧之地清
寧間邊將不謹爲宋所侵烽埃內移似非所宜道宗然之拜北
面林牙後遣人使宋得其侵地命頗的往定疆界還拜南院宣
徽使太康四年遷忠順軍節度使尋爲南院大王改南京畱守
同知召拜南府宰相賜貞良功臣封吳國公轉北院樞密使廉
謹奉公知無不爲大安中致仕卒子霞抹北院樞密副使

耶律拔里得字孩鄰太祖弟刺葛之子太宗卽位以親愛見任
會同七年從討石重貴進圍德州下之擒刺史師居播等二十
七人任爲令穩九年再舉兵次滹沱河降杜重威戰功居多入

拜授安國軍節度使總領河北道事師還州郡往往復叛以應

劉知遠因不能守而歸世宗初遷中京畱守卒 子海里性儉

素不喜聲利以射獵自娛雖居閑人敬之若貴官然母的魯與

察割亂遣人召海里拒之亂平的魯以子故獲免保寧初海里

拜彰國軍節度使遷惕隱秩滿稱疾不仕久之復除南院大王

居十餘年鎮以寬靜戶口增給時議重之宋曹彬米信等來侵

海里有却敵功賜資忠保義匡國功臣封漆水郡王遷上京畱

守薨詔以家貧給葬具 子賢適字阿古真嗜學有大志滑稽

玩世人莫之知惟屋質器之語人曰是人當國天下幸甚應曆

中朝臣多以言獲譴獨樂於靜退游獵自娛與親朋言不及時

事會討烏古還擢右皮室詳穩景宗在藩賴其規導穆宗終不

見疑皆其力也卽位以功加檢校太保尋遷授寧江軍節度使

賜推忠協力功臣帝初踐阼疑諸王多萌非望陰倚爲腹心加特進同中書門下平章事保寧二年秋拜北院樞密使兼侍中加號保節功臣三年爲西北路兵馬都部署生平忠介膚敏推誠待人雖燕息不忘政務以故百司字職罔敢偷墮累年滯獄悉決之嘗患大丞相高勳行宮都部署女里及帝姨母保母席寵放肆薰灼一時納賂請謁門若賈區言于帝不報以病解職又不允令鑄手印行事乾亨初疾篤得請明年封西平郡王薨年五十三子觀音大同軍節度使

送刺孫合住字粘滾幼不好弄以近族入侍每從征伐有功保寧初加右龍虎衛上將軍時宋師屢梗南邊拜涿州刺史西南兵馬都監兼招安巡檢等使久任邊防屢有克獲賜推忠奉國功臣然務鎮靜不妄生事以邀近功鄰壤敬畏屬部又安宋數

遣人結歡冀達和意表聞帝許之安邊懷敵多有力焉拜左金吾衛上將軍護衛太保重熙六年兼長寧宮使秩滿遷攝鎮國軍節度使卒生平智而有文曉暢戎政臨事明敏善談論鎮范陽時嘗領數騎徑詣雄州北門與郡將立馬陳兩國利害及周師侵邊本末辭氣慷慨左右壯之自是邊境數年無事識者謂合住一言賢於數十萬兵

太祖長子倍小字圖欲自幼向學好賓客通陰陽知音律精醫藥鍼砭之術立爲皇太子遇太祖問侍臣受命之君當事天敬神朕欲祀有大功德者以何爲先皆以佛對倍曰佛非中國教惟孔子大聖萬世所尊此最宜先祖大悅卽建孔子廟詔皇太子春秋釋奠嘗從征烏古党項爲先鋒都統神冊五年九月率送刺剖吞離董汗里軫等畧地雲內天德明年命經畧燕地至

定州祖方與李存勗相拒雲碧店引兵馳赴敗走之會西征畱
守京師因陳取渤海計從拔扶餘城上欲括戶口倍諫今始得
地而料民民必不安若乘破竹之勢徑造忽汗城克之必矣從
之命爲前鋒夜圍忽汗城大誣誤降命鎮之敗其國曰東丹城
曰天福制稱人皇王建元甘露賜以天子旌旗冠服設置百官
一用漢法歲貢布十五萬端馬千匹仍諭此地瀕海非可久居
畱汝撫治以見朕愛民之心駕將還作歌以獻陛辭再諭得汝
治東土吾復何憂號泣而別遂如儀坤州未幾太祖討至即日
奔赴山陵知皇太后本意欲立德光讓以大位立後尚在皇都
詔遣耶律羽之遷東丹民以實東平升其郡爲南京徙倍居之
添置衛士陰伺動靜倍不能安唐明宗遣人跨海持書招之其
使再至因畋遊海上立木刻詩曰小山壓大山大山全無力差

見故鄉人從此投外國竟携高美人而去 以來自遼東改瑞州
爲懷化軍拜爲節度使兼瑞慎等州觀察 處置等使長興元年
更賜姓李名贊華移鎮滑州迺領虔州節度使其部曲五人皆
賜姓名罕只曰罕友通穆葛曰穆順義叟羅曰羅賓德易密曰
易師仁蓋禮曰蓋來賓皆拜歸化歸德 軍郎將會同三年正
月人皇王如來朝後遇從珂弒立密報六宗請討之遼兵入洛
從珂遣宦者秦繼旻皇城使李彥紳害之年三十八洛陽僧爲
收瘞石敬瑭喪服臨哭以王禮權厝太亦改葬于鑿巫閭山諡
曰文武元皇王世宗加號讓國皇帝陵曰顯陵統和中更謚文
獻重熙增謚文獻欽義皇帝廟號義宗生平喜書市至萬卷藏
于鑿巫閭絕頂之瑩海堂工遼漢文章常譯陰符經復善畫本
國人物如射獵雪騎千鹿圖皆入宋秘府然性刻急好飲人血

左右姬妾多刺其臂吮之有小過輒挑目割灼不勝其毒二妃
初封皇后諡曰端順柔貞柔貞實生世宗加尊皇太后割察弑
之五子婁國見逆臣彙 隆先字團隱母大氏景宗封平王未
幾兼政事令畱守東京薄賦稅省刑獄恤鰥寡數薦賢能之士
與室魯司討高麗有功還薨葬鑿巫闾山之道隱谷爲人聰明
博學能詩有闔苑集行于世子陳哥保寧末與渤海官屬謀殺
其父舉兵作亂上命曠裂而死 道隱字畱隱母高美人生時
適遇父難洛陽僧匿而養之因命今名唐滅詔還京賜居外羅
山地性沉靜有文武才時人稱之景宗時封蜀王爲上京畱守
乾亨元年遷守南京號令嚴肅民獲安業徙封荆王聖宗初立
奏宋遣使獻犀帶請和詔以無書却之統和元年正月甲戌薨
追封晉王。

第三子李胡一名洪古字奚隱少勇悍多力母淳欽皇后篤愛
之然性殘酷小怒輒黥人面或投水火中以是太祖嘗言人皇
王巧太宗有成少者不及天顯四年太宗命帥師討雲中郡縣
之未附者丁卯餞之西郊五年正月庚午奏拔寰州捷多俘而
還二月癸卯朝上于行在以先所俘渤海戶賜之三月丁卯從
李胡請赦宗室舍利郎君以罪繫獄者時皇子尚未生乃立爲
皇太弟兼兵馬大元帥八年正月庚子命與左威衛上將軍撒
割率兵伐黨項三月辛卯勝還宴勞之後遇車駕親征常畱守
京師大同元年滅晉回還遣使問軍前事上報之畧曰初以兵
二十萬降杜重威張彥澤下鎮州及入汴視其官屬具員者省
之當才者任之司屬雖存官吏廢墮猶雛飛之後徒有空巢久
經離亂所在盜結土功不息餽餉非時民不堪命河東尚未歸

命西路渠帥亦相黨附夙夜以思制之之術惟推心庶僚和協
軍情撫綏百姓三者而已今所歸順凡七十六處得戶一百九
萬百一十八汴州水上炎熱難居若得一年太平可指掌而致
且收鎮州爲中京以備巡幸欲伐河東姑俟別圖世宗卽位鎮
陽太后聞之怒遣李胡率兵以拒安肅劉哥遣人馳報世宗請
爲前鋒至秦德泉遇李胡戰敗之與世宗隔黃河而陣各言舉
兵意復整兵拒于橫渡相持數日世宗遣郎君勤德等詣兩軍
諭解太后囚屋質諫各罷兵乃言昔武興太祖愛汝異於諸子
諺云偏憐之子不保業難得之婦不工家我非不欲立汝汝自
不能及會議世宗使解劔而言和約既定趨上京會有告其復
與太后謀廢立者徙之祖州禁其出入誅司徒劃設及楚補里
應曆十年冬坐其子喜隱謀反遂下獄死年五十葬玉峯山西

谷統和中追諡欽順皇帝妃爲皇后重熙更諡章肅后曰和敬

喜隱字完德雄偉善騎射初封趙王以反謀事覺上臨問有狀
讓親釋之未幾復反下獄聞景宗卽位自脫桎梏而朝上怒曰
汝罪人何得擅離禁所詔誅守者復實于獄會改元赦宥之妻
以皇后姊復封宋王素輕僇無恒小得志卽驕上嘗召不時至
怒而鞭之由是憤怨謀亂貶而復召適見上與劉繼元書辭意
卑遜諫曰本朝於漢爲祖書旨如此恐虧國體帝尋改之保寧
九年六月丙辰授西南面招討使命之河東索吐蕃戶稍見進
用復誘羣小謀反上命械其手足築圍土囚祖州宋降卒二百
餘人欲劫立喜隱以城堅不得入立其子畱禮壽被擒伏誅賜
喜隱死里次完應曆三年與郎君稽幹敵烈謀反事發辭連鞞
撒葛林牙華割郎君新羅等皆被執明年稽幹華割伏誅宛及

卷一百一十一 魏書 卷一百一十一 魏書
管撒葛皆免死景宗進封衛王卒
又次牙里果字敵輦宮人蕭氏生性沉默善騎射天顯三年以
救耶律沙于定州爲李嗣源所獲至石晉立始得還爲楊隱以
疾薨 二子敵祿爲楊隱性質直多膂力聞察割亂入見壽安
王慷慨言願得精兵數百破賊黨王嘉其忠穆宗卽位爲北院
宣徽使上以飛狐道狹詔敵祿廣之明年遷南府宰相將兵援
河東至太原與漢王會于高平擊周軍敗之仍降其衆析代二
州叛將兵討之會耶律撻烈至敗周師於忻口師還卒 奚低
便弓馬勇攻戰景宗時爲右夸離畢多任以軍事保寧三年正
月甲寅遣人獻敵烈俘詔賜有功將士統和四年爲右皮室詳
穩凡戰必以身先矢無虛發時楊繼業敗于朔州之南匿深林
中有令須生擒繼業奚低以故望袍而射不能有功後太后南
伐屢有戰績爲北院大王保安軍節度事清寧四年爲奚六部
大王以病卒

大祖養子朔古字彌骨頂與顏昱俱橫帳孟父房後旣冠爲右
皮室詳穩從伐渤海有功天顯七年授三河烏古部都詳穩民
安其政平易近民令久其任會同間爲楊隱從征石重貴晉將
杜重威擁衆拒滹沱河朔古與趙延壽據中渡橋月餘重威兵
却遂降太宗崩命奉其喪歸上京世宗卽位因佐皇太后出師
坐是免官卒 顏昱字團寧夸離董末撥之子爲人性端直會
同中領九石烈部政濟寬猛世宗卽位爲楊隱天祿三年兼政
事令封漆水郡王穆宗立以匡贊功嘗許以後本部大王會世
宗將葬懇言於帝臣蒙先帝厚恩未能報請陪位送之由是不
悅寢其議薨

太宗次子罽撒葛初封太平王世宗詔許與晉王往復以昆弟
禮穆宗因同母弟委以國政坐謀反辭連貶西北邊戍景宗卽
位罽撒葛懼竄入大漠夸離畢粘木衮以陰附伏誅未幾召還
釋其罪進封齊王保寧四年病疽薨贈皇太叔諡欽靖天德
字苾扇宮人蕭氏生與敵烈必攝同母爲人猛悍趨捷人望而
畏太宗拒杜重威欲以計破之募能斷糧道者從天德請令引
五千騎從間道擊走衛送之軍火其輜重重威窮蹙乃降會同
三年五月甲申遣與檢校司徒邸用和使晉世宗卽位因遣護
送太宗靈柩于上京與李胡遇泰德泉力戰敗之太后不悅遂
不復用後坐與蕭翰等謀反伏誅敵烈字已速董爲人多力
善射應曆九年與宣徽使耶律海恩及蕭達于等謀反事覺穆
宗告祀天地祖考釋之保寧初封冀王宋人侵漢與耶律沙將
兵往援却敵而還乾亨初宋主攻河東至白馬嶺敵烈以先鋒
度澗未半宋軍迎擊師潰與子哇哥俱歿于陣必攝字箴董
穆宗封爲越王應曆間族人恒特及蕭噉里有罪欲亡必攝密
以聞上以爲忠常命侍從諫上輕殺左右會又欲誅監鹿官固
請得免景宗時討党項有功保寧五年二月壬辰獻俘後以疾
薨

世宗子吼阿不景宗同母兄早薨景宗立親祭于墓號太子院
追冊爲皇太子諡莊聖只沒字和魯董妃甄氏生敏給好學
通契丹漢字能詩常與宮人私通穆宗怒榜掠繫獄景宗立釋
之賜以所私宮人旋封朔寧王保寧八年妻安只造蠱毒奪爵
貶烏古部賦放鶴詩徵還統和初皇太后稱制命賦芍藥詩詔
復舊爵

景宗子隆慶字燕隱小字普賢奴與隆祐皆聖宗同母弟八歲封恒王兼侍中統和中拜南京畱守徙梁王十七年南征爲先鋒至瀛州遇宋將范廷召列陣以待隆慶遣蕭柳擊敗之逃入空壁圍而盡燼十九年復敗宋人于行唐開泰初加守太師兼政事令更封晉國王尋拜大元帥南京畱守賜金券進封秦晉國王五年九月入覲上親出迎勞至實德山因同獵于松山十月二月乙酉還至北安州浴溫泉疾薨訃聞上爲哀慟輟朝七日追贈皇太弟葬暨巫閭山子查葛中王郡王保靜軍節度使封潞王太平中各將之官上選官伴讀經史重熙五年爲南府宰相轉南院樞密使九年爲南院大王十一年徙封越國王清寧二年爲上京畱守進封魏國王三年復爲惕隱轉遼興軍節度使卒遂哥樂安郡王廣德軍節度使進封幽王爲惕隱重

熙十五年卒謝家奴長沙郡王匡義軍節度使進封懷王清寧五年移節武定軍乾統六年爲南院大王不知所終隆祐小字高七一字胡都堇乾亨初封鄭王統和中伐宋畱守京師二十一年拜西南面招討使徙王吳及征高麗復爲畱守權知北院樞密使事出守東京更王楚明年南征復爲畱守開泰初改王齊薨輟朝五日贈太師諡仁孝重熙間改諡孝靖子胡都古封周王遼興軍節度使轉臨海軍貼不豫章郡王長寧軍節度使進封陳王爲南府宰相重熙十五年遷中京畱守清寧三年轉東京五年又轉西京後爲重元所殺削爵流鎮州聖宗子別古特小字撒刺賜名宗簡爲人明敏善射初授右衛大將軍太平七年遙領彰信軍節度使爲王子郎君班詳穩重熙中累遷契丹行宮都部署封柳城郡王討夏國督戰有功重

還薨 吳哥字洪隱賜名宗愿僕隗氏生開泰二年任惕隱七年授左驍衛大將軍出爲南京留守薨 侯古字訛里本賜名宗偉初授右衛大將軍重熙初任王子郎君班詳穩十七年封饒樂郡王咸雍中徙混同郡王清寧初爲中京留守四年遷南院大王八年薨于任遣使致祭 興宗子和魯幹字阿輦與阿璉皆道宗同母弟重熙十七年封越王清寧初徙魯王又進宋國王拜上京留守改南京加宋魏二國王天祚卽位以爲天下兵馬大元帥加守太師免拜不名三年冊爲皇太叔加號曰義和仁壽六年兼惕隱復守南京重元亂夜赴戰所有詔弛圍場之禁奏曰天子以巡狩爲大事雖居諒陰不可廢也上以爲然復命有司促備春水之行十年閏七月從獵于慶州薨三千石駕宜徽北院使封漆水郡王次遠

次淳

阿璉字訛里本重熙十七年封許王清寧初徙陳王又

進秦國王知中丞司事出爲遼興軍節度使加秦越二國王咸雍間歷西京上京留守大安三年七月丁丑從車駕秋獵以疾薨追封秦魏國王 淳小字涅里自幼太后鞠育旣長篤好文學初封北平郡王昭懷太子廢道宗欲立爲嗣耶律白斯不知出爲彰聖軍節度使天祚卽位封鄭王乾統二年爲東京留守加越國王六年拜南府宰相首議制兩府禮儀上喜徙封魏國王命繼其父留守南京遇冬夏入朝寵冠諸王天慶五年東征都監耶律章奴與淳子阿撒等三百餘人亡歸欲謀廢立上遣駙馬蕭昱領兵詣廣平淀護后妃行宮小底乙信持書報魏國王時章奴先遣淳妃親兄蕭敵里及甥蕭延留以所謀說淳淳疑此非細事主上自有諸王當立今北南面大臣不來獨汝言

及此何也密令左右拘之有頃乙信等齎御札至備言章奴等
叛淳立斬敵里等傳首以獻單騎間道詣廣平淀待罪上遇之
如初六年進封秦晉國王拜都元帥賜金券免漢拜禮不名許
自擇將士乃募燕雲精兵東至錦州隊長武朝彥作亂劫淳復
匿而免收朝彥誅之會金兵至戰于阿里軫斗敗績收亡卒數
千拒之淳入朝上再釋其罪詔南京刻石紀功保大三年天祚
入夾山諸大臣奚王回離保林牙大石等引唐靈武故事議欲
立淳淳又不從初詔留宰相張琳李處溫與淳守燕處溫弟處
能子爽外假怨軍內納都統蕭幹遂與左企弓虞仲文曹勇義
康公弼集蕃漢百官諸軍及父老數萬人詣淳府勸進處溫邀
琳至白其事琳曰王雖帝胄初無上命攝政則可卽真則不可
處溫曰天意人心已定請立班耳琳始有難色後勉從之處溫

等請之再三曰主上蒙塵中原擾攘若不立王百姓何歸宜熟
計之淳方出爽持赭袍被之令百官拜舞山呼淳驚駭辭不獲
已乃從之三月卽位號天錫皇帝改是年爲建福元年大赦以
處溫守太尉琳守太師企弓守司徒勇義知樞密院事仲文領
西京留守內外諸軍都統公弼簽書樞密院事俱賜號忠烈翊
聖功臣處能直樞密院爽少府少監提舉翰林醫官李爽陳祕
十餘人曾與大計授官有差放進士李寶信等一十九人遙降
天祚爲湘陰王以燕雲平上京中京遼西六路號爲北遼淳主
之沙漠以北西南西北路兩都招討府諸蕃部族等仍隸天祚
自此國分爲二封其妻普賢女爲德妃攝政加企弓侍中以蕭
幹爲北樞密使回離保知北院樞密使事駙馬蕭旦同知院事
改怨軍爲常勝軍軍旅之事悉委大石遣使報宋免歲幣結好

宋人發兵問罪擊敗之尋遣使奉表于金乞爲附庸事未決六月淳寢疾聞有檄傳天德雲內朔武應蔚等州合諸蕃精兵五萬騎約以八月入燕并遣人問勞索衣裘茗藥淳甚驚懼命南北面大臣議處溫與幹等進迎秦拒湘之說再命集蕃漢百官共議從其議者東立惟南面行營都部署耶律寧西立處溫等問故寧曰天祚果能以諸蕃兵大舉奪燕則是天數未盡豈能拒之否則秦湘父子也拒則皆拒自古安有迎子而拒其父者乎處溫等相顧微笑恐寧扇亂軍心欲殺之淳歛枕長嘆曰彼忠臣也殺之何爲天祚果來吾有死耳復何面目相見耶已而淳薨年六十百官僞諡曰孝章皇帝廟號宣宗葬燕西香山永安陵遺命遙立秦王定以存社稷尊德妃爲皇太后主軍國事權稱制改建福爲德興元年放進士李球等百八人時宋兵來

攻戰敗之人心大悅兵勢日振處溫父子懼禍南通童貫潛納宋兵居民被殺甚衆欲挾太后納土于宋復欲北通于金約爲內應外以擁立大功自陳太后罵曰誤秦晉國王者皆汝父子何功之有乃悉數其過惡數十處溫無以對賜死鬻其子奭而磔之三年太后五表于金求立秦王不從金兵入居庸關德妃出古北口奔天德軍見天祚天祚怒誅德妃降淳庶人除其屬籍盡釋其黨處溫耶律儼姪以儼與蕭奉先厚善得薦爲相感其汲引傾心阿附以固權位而貪污尤甚凡所接引類多小人居位數月籍其家財得錢七十萬緡金玉寶器稱是琳潘州人幼有大志壽隆末爲秘書中允天祚卽位累遷戶部使由樞密副使知樞密院事項之進南府宰相以諸將皆據權要琳獨十日一朝陽尊以元老實不使與政心懷鬱摠時已年高令子弟上

降表于金詔燕京應琳田宅財物並給還之俄卒

道宗長子濬小字耶魯幹幼而聰慧能言好學知書道宗嘗謂天授六歲封梁王從上獵矢連發三中領左右曰朕祖宗以來騎射絕人威震天下是兒雖幼不墜家風後遇十鹿射獲其九帝喜設宴八歲立爲皇太子大康元年兼領北南樞密院事三月乙巳命寫佛書六月丙辰詔總領朝政仍戒諭之十一月辛酉母后被害太子有憂色耶律乙辛常不自安會護衛蕭忽古謀害乙辛事覺下獄副照檢蕭十三謂乙辛曰今太子見在臣民屬心大王素無根祇之助復有誣后之怨若一旦太子立吾輩措身無地宜熟計之乙辛曰吾憂此久矣卽夜與蕭得裏特謀陷太子陰令護衛太保耶律查刺誣告都宮使耶律撒刺知院耶律速撒護衛蕭忽古謀廢立詔案無迹復令蕭訛都幹等誣首查刺前告非妄臣實與謀本意欲殺乙辛等然後立太子

臣若不言恐事發連坐帝信之幽太子于別室復令其黨耶律燕哥往驗太子不服具陳所以誣枉之狀曰帝惟我一子今爲儲副尚何所求敢爲此事公與我本昆弟行當爲我辯懇之甚悉蕭十三語燕哥曰若如此奏則大事去矣當易其言爲欵伏上大怒廢太子爲庶人將出口我何罪十三叱登車遣衛士闔其扉徙于上京囚圜堵中乙辛又用十三計遣蕭達魯古撒把往害之年二十畱守蕭撻得給聞以疾薨上哀之命有司葬龍門山欲召其妃乙辛復遣人殺之後知其寃悔恨無及諡曰昭懷太子以天子禮改葬玉峯山乾統初子延禧卽位追尊大孝順聖皇帝廟號順宗妃蕭氏貞順皇后

天祚六子長敖盧幹甫髻亂馳馬善射出爲大丞相耶律隆運

後封晉王最爲賢名樂道人善而矜人不能嘗入寢殿見小底
茶刺閱書因取觀會諸王至見讀書者輒斥陰袖而歸曰勿令
他人見也一時號稱長者及長積有人望內外歸心時趙昭容
生趙王習泥烈元妃生秦王定許王寧元妃兄蕭奉先恐秦王
不得立潛圖謀害會母文妃姊適耶律撻葛里次適耶律余覲
俱會軍前奉先誣與蕭馬蕭等密謀立晉王事覺余覲降金
故盧幹實不與謀獲免保大二年上聞余覲引金兵奄至不勝
畏懼奉先因給以余覲乃王子班苗裔此來實無亡遼心特欲
立甥晉王耳若爲社稷計不惜一子金兵可不戰自迴上信之
或勸放盧幹亡辭曰安忍爲叢爾之軀失臣子之大節遂就死
上素服三日諸軍聞者皆爲流涕遠近益皆解體後秦趙許三
王從上至白永樂皆爲金兵所獲 次子雅里字撒鷲七歲封

王欲立爲皇太子別置禁衛保大三年金師圍青塚雅里
在軍中太保特母哥挾之出走聞道行至陰山聞天祚已趨雲
內趣赴行在時扈從千餘多於天祚慮恐生變欲誅特母哥責
以不能全救諸王仗劍召雅里問曰特母哥教汝何爲雅里對
曰無他言始釋之天祚渡河奔夏軍將耶律敵烈等劫雅里奔
西北部至沙嶺見蛇橫道而過識者以爲不祥後三日羣僚共
立雅里爲主僭卽帝位改元神曆命士庶上便宜素性寬大惡
誅殺凡獲亡者笞之而已有自歸者卽官之常謂左右欲附來
歸不附則去何須威逼每取唐貞觀政要及林牙資忠所作治
國詩令侍從讀之烏古部節度使紇哲迭列部統軍撻不也都
監突里不等各率其衆來附自是諸部繼至而雅里日漸荒怠
好擊鞠特母哥切諫乃不復出以敵烈爲樞密使特母哥副之

敵烈劫西北路招討使蕭糺里熒惑衆心志在不臣與其子麻
 混並誅之以遙設為招討使與諸蕃戰數敗杖免官從行有疲
 困者輒振給之直長保德諫曰今國家空虛賜賚若此將何以
 給雅里怒曰昔畋於福山卿誣獵官今復有此言若無諸部我
 將何取不納初令羣牧運鹽灤倉粟而民盜之議籍以償雅里
 乃自為直每粟一車抵償一羊三車一牛五車一馬八車一駝
 左右曰今一羊易粟二斗且不可得乃償一車雅里曰民有則
 我有若令盡償民何堪後獵查刺山一日而射黃羊四十狼二
 十一因致疾未踰年卒年三十特母哥降于金

耶律大石字重德世號西遼太祖八代孫通遼漢文字兼善騎
 射登天慶五年進士擢翰林應奉尋陞承旨時稱大石林牙

言翰
林也歷泰祥二州刺史遼興軍節度使金祖人居庸關自古北

口亡去以其衆襲奉聖州為婁室所獲并降其衆幹離不襲遼
 主以為鄉導既而亡去預謀立秦晉王淳王死復立其妻天祚
 責之我在汝何敢輒議改圖對曰陛下以全國不能拒一敵棄
 而遠遁使黎民塗炭淳乃太祖子孫勝於乞命他人上無以答
 賜之酒食赦其罪因力諫天祚始金陷長春遼陽車駕不守廣
 平旋而幸中京伺陷上京又幸燕山及陷中京復幸雲中白雲
 中而播遷夾山向以全師不謀戰備使舉國漠地皆為金有勢
 已至此方求攻戰甚非長策當養兵畜銳待時而動不可輕舉
 上不從大石不自安遂殺蕭乙薛坡里括自立為王率鐵騎二
 百宵遁北行三月過黑水見白達達詳穩牀古兒獻馬馳牛羊
 西至可敦城駐北庭都護府會威武崇德會蕃新大林紫河馳
 等七州及大王空韋敵刺王紀刺茶赤刺也喜鼻古德泥刺達


刺乖達密里密兒紀合只烏古里阻卜普速完唐古忽母思奚
的糺而舉十八部衆諭曰我祖宗艱難創業更世九主歷年二
百金以臣屬逼我國家殘我黎庶屠剪我州邑使天祚皇帝蒙
塵于外日夜痛心疾首我今仗義而西欲借力諸蕃翦我讐敵
復我疆宇惟爾衆亦有軫我國家憂我社稷思共救君父濟生
民於難者乎遂得精兵萬餘戰馬萬匹置南北面官僚立排甲
具器仗明年二月甲午以青牛白馬祭天地祖宗整旅而西先
遣書回鶻王罪勒哥曰昔我太祖皇帝北征過卜古罕城即遣
使至甘州詔爾祖烏母主曰汝思故國朕即爲汝復之汝不能
返朕則有之在朕猶在爾也爾祖即表謝以爲遷國于此十有
餘世軍民皆安土重遷不能復返矣是與爾國非一口之好也
今我將西至大食假道爾國其勿致疑畢勒哥得書即迎至邸

大宴三日臨行獻馬六百驢百羊三千願質子孫爲附庸送至
境外所過敵者勝之降者安之兵行萬里歸者數國獲駝馬牛
羊財物不可勝計軍勢日盛銳氣日倍至尋思干西域諸國舉
兵十萬號忽兒珊來拒戰兩軍相望二里許諭將士曰彼軍雖
多而無謀攻之則首尾不救我師必勝遣六院司大王蕭幹里
刺招討副使耶律松山等將兵二千五百攻其右樞密副使蕭
刺阿不招討使耶律木薛等將兵二千五百攻其左自以衆攻
其衆三軍俱進忽兒珊大敗僵屍數十里駐軍尋思干凡九十
日回回國王來降貢方物又西至起兒漫文武百官冊立爲帝
以甲辰歲二月五日卽位年三十八號葛兒罕漢尊號曰天祐
皇帝改元延慶追諡祖父爲嗣元皇帝祖母宣義皇后冊妣蕭
氏爲昭德皇后因謂百官朕與卿等行三萬里跋涉沙漠夙夜

艱勤賴祖宗之福卿等之力冒登大位爾祖爾父宜加卹典共
享尊榮自蕭幹里刺而下四十人祖父封爵有差延慶三年
班師東歸馬行二十日得善地遂建都城號虎思幹耳朶改延
慶爲康國元年三月以六院司大王蕭幹里刺爲兵馬都元帥
敵剌部前同知樞密院事蕭查刺阿不副之茶赤剌部禿魯耶
律燕山爲都部署護衛耶律鐵哥爲都監率七萬騎東征以青
牛白馬祭天樹旗以誓于衆曰我大遼自太祖太宗艱難而成
帝業其後嗣君耽樂無厭不恤國政盜賊蠶起天下土崩朕率
爾衆遠至朔漠期復大業以光中興此非朕與爾世居之地申
命元帥幹里刺曰今汝其往信賞必罰與士卒同甘苦擇善水
草以立營量敵而進毋自取禍敗也行萬餘里無所得牛馬多
死勒兵而還大石曰皇天弗順數也康國十年歿在位二十年

廟號德宗子夸列年幼遺命皇后權國后名塔不煙號感天皇
后稱制改元咸清在位七年子夸列卽位改元紹興籍民十八
歲以上得八萬四千五百戶在位十三年歿廟號仁宗子勿遺
詔以妹普速完權國稱制改元崇福號承天太后後與駙馬蕭
朶魯不弟朴古只沙里通出駙馬爲東平王羅織殺之駙馬父
幹里刺以兵圍其宮射殺普速完及朴古只沙里普速完在位
十四年仁宗次子直魯古卽位改元天禧在位三十四年時秋
出獵乃蠻王屈出律以伏兵八千擒之而據其位遂襲遼衣冠
尊直魯古爲太上皇皇后爲皇太后朝夕問起居以侍終焉直
魯古死遼絕舊史贊曰耶律淳在天祚之世歷王大國受賜
金券贊拜不名一時恩遇無與爲比當天祚播越以都元帥留
守南京獨不可奪大義以激燕民及諸大臣興勤王之師東拒

金而迎天祚乎乃自取之是篡也况忍王天祚哉大石既帝淳
而王天祚矣復歸天祚責以大義乃自立為王而去之幸籍祖
宗餘威遺智建號萬里之外雖寡母弱子更繼迭承幾九十年
亦可謂難矣然淳與雅里大石之立皆在天祚之世有君而復
君之其可乎哉與諸葛武侯為獻帝發喪而後立先主為帝者
不可同年語矣



弘簡錄卷二百七 終

